

張氏醫通

張氏醫通卷之四

長洲石頑張

男

以柔安世

訥遜言

恭訂

諸氣門下

痰飲

喘

金匱云問曰大飲有四何謂也師曰有痰飲有懸飲有溢飲有支飲問曰四飲何以爲異師曰其人素盛今瘦水走腸間漑漑有聲謂之痰飲飲後水流在脇

下欬唾引痛謂之懸飲。飲水流行歸於四肢。當汗出而不汗出。身體疼重。謂之溢飲。欬逆倚息。短氣不得卧。其形如腫。謂之支飲。

痰飲爲患。十人居其七八。金匱論之甚詳。分別而各立其名。後世以其名之多也。徒徇其末而忘其本。曾不思聖人立法。皆從一源而出。無多岐也。蓋胃爲水穀之海。五藏六府之大源。飲入於胃。遊溢精氣。上輸於脾。脾氣散精。上歸於肺。通調水道。下輸膀胱。水精四布。五經並行。以爲常人。金匱卽從

水精不四布五經不竝行之處以言其患隨證分別淺深。誨人因名以求其義淺者在於軀殼之內藏府之外其飲有四一由胃而下流於腸一由胃而傍流於脇一由胃而外出於四肢一由胃而上入於胸膈始先不覺日積月累水之精華轉爲混濁於是遂成痰飲必先團聚於呼吸大氣難到之處故由腸而脇而四肢至漸漬於胸膈其勢愈逆則痰飲之患未有不從胃起見者矣夫五藏藏神之地也積水泛爲痰飲包裹其外詎非人身之大

患乎凡水飲畜而不散者皆名留飲。留者留而不去也。留飲去而不盡者皆名伏飲。伏者伏而不出也。隨其痰飲之或留或伏而用法以治之。始爲精義。今試言之。由胃而上胸脇心肺之分者驅其還胃。或下從腸出。或上從嘔出。而不至於伏匿。若由胸膈而外出肌膚其清者或從汗出。其濁者無可出矣。必有伏匿肌膚而不勝驅者。若由胸膈而深藏於背。背爲胸之府。更無出路。豈但驅之不勝驅。且有挾背間之狂陽壯火發爲癰毒者。伏飲之難。

於下出。易於釀禍。其誰能辯之。誰能出之耶。

水在心。心下堅築短氣。惡水不欲飲。水在肺。吐涎沫。欲飲水。水在脾。少氣身重。水在肝。脇下支滿。噎而痛。水在腎。心下悸。○夫心下有留飲。其人背惡寒。冷如掌大。○留飲者。脇下痛。引缺盆。欬嗽則輒已。一作甚○胸中有留飲。其人短氣而渴。四肢歷節痛。脉沉者。有留飲。○膈上病痰滿喘欬吐。發則寒熱。背痛腰疼。目泣自出。其人振振身瞤而劇。必有伏飲。○夫病人飲水多。必暴喘滿。凡食少飲多。水停心下。甚者則悸。微

者短氣。脉雙弦者寒也。皆大下後善虛。脉偏弦者飲也。○肺飲不弦。但苦喘短氣。○支飲亦喘而不能卧。加短氣。其脉平也。○病痰飲者。當以溫藥和之。心下有痰飲。胸脇支滿。目眩。苓桂朮甘湯主之。小便則利。

靈樞曰。包絡是動。則病胸脇支滿。痰飲積其處。而爲病也。心下有痰水。精不上注於目。故眩。茯苓治痰水。伐腎邪。桂枝通陽氣。開經絡。白朮治痰水。除脹滿。然中滿勿食甘。反用甘草何也。蓋桂枝之辛。

得甘則佐其發散和其熱而使不僭上。甘草有茯苓則不支滿而反滲泄。甘能下氣除滿也。夫短氣有微飲當從小便去之。苓桂朮甘湯主之。腎氣丸亦主之。

微飲而短氣由腎虛水邪停蓄致三焦之氣升降呼吸不前也。二方各有所主。苓桂朮甘湯主飲在陽呼氣之短。腎氣丸主飲在陰吸氣之短。蓋呼者出心肺吸者入腎肝。茯苓入手太陰。桂枝入手少陰。皆輕清之劑治其陽也。地黃入足少陰。山萸入

足厥陰皆重濁之劑治其陰也然必視其人形體之偏陰偏陽而爲施治一證二方豈無故哉病者脉伏其人欲自利利反快雖利心下續堅滿此爲留飲欲去故也甘遂半夏湯主之

留飲堵塞竅隧胃氣不得轉輸故脉伏不顯若留飲既下胃氣受傷必欲自利自利而反快者中焦所塞暫通也通而復積故續堅滿必更用藥盡逐之然欲直達其積飲莫若甘遂快利用之爲君欲和脾胃除心下堅又必以半夏佐之然芍藥停溼

何留飲用之甘草與甘遂相反何一方並用蓋甘
草緩甘遂之性使不急速徘徊逐其所留芍藥治
木鬱土中而成堅滿又佐半夏以和胃消堅也
脉沉而弦者懸飲內痛病懸飲者十棗湯主之

懸飲結內作痛故脉見沉弦用芫花之辛以散飲
甘遂大戟之苦以泄水大棗之甘入脾而勝水也
病溢飲者當發其汗大青龍湯主之取微似汗汗多
者溫粉粉之小青龍湯亦主之

水飲溢出於表營衛盡為不利猶傷寒之營衛兩

傷故必發汗以散水而後營衛經脈始行四肢之水亦得消矣。表鬱實熱者用大青龍以發之內畜寒飲者用小青龍以發之。雖皆表散之法而微有不同。不可不辨。

膈間支飲。其人喘滿。心下痞堅。面色黧黑。其脈沉緊。得之數十日。醫吐下之不愈。木防已湯主之。虛者即愈。實者三日復發。復與不愈者。木防已湯去石膏加茯苓芒硝湯主之。微利則愈。

支飲在膈間。氣血皆不通利。氣不利則與水同逆。

於肺而發喘滿血不利則與水雜。採結於心下而爲痞。堅腎氣上應水飲。腎水之色黑。血凝之色亦黑。故鰐黑之色而見於面也。脉沉爲水。緊爲寒。非別有寒邪。卽水氣之寒也。醫雖以吐下之法治然。藥不切於病。故不愈。用水防已以散留飲。結氣石膏主心肺逆氣。人參以助胃。祛水桂枝以和營。開結且支飲得溫則行。若邪客之淺在氣分多而虛者服之卽愈。若邪客之深在血分多而實者則愈後必再發。以石膏爲氣分藥。故去之。芒硝爲血分

藥能治痰輒堅茯苓伐腎利水而爲芒硝之佐故加之。

心下有支飲其人苦冒眩澤瀉湯主之。

支飲阻其陽之升降鬱久化火火動風生而冒眩也故用澤瀉開關利水以泄支飲白朮和中燥濕則陽自升而火自息矣。

支飲胸滿者厚朴大黃湯主之。

此卽小承氣以大黃多遂名厚朴大黃湯若厚朴多則名厚朴三物湯此支飲胸滿者必緣其人素

多溼熱。渴飲上逆所致。故用蕩滌中焦藥治之。
支飲不得息。葶藶大棗瀉肺湯主之。

支飲留結氣塞胸中。故不得息。葶藶破結利飲。大
棗通肺和中。以其氣壅則液聚。液聚則熱結。所以
與肺癰同治也。

嘔家本渴。渴者爲欲解。今反不渴。心下有支飲故也。
小半夏湯主之。卒嘔吐。心下痞滿。間有水眩悸者。
小半夏加茯苓湯主之。

嘔本有痰。嘔盡痰去而渴者。爲欲解。與傷寒服小

青龍湯已渴者寒去欲解同義今反不渴是積飲
尚留去之未盡故用半夏散結勝溼生薑散氣止
嘔千金方更加茯苓佐之卽與治卒嘔吐心下痞
膈間有水眩悸者同法也

腹滿口舌乾燥此腸胃間有水氣已椒蘆黃丸主之
口中有津液渴者加芒硝半兩

水積腸間則肺氣不宣臍鬱成熱而爲腹滿津液
遂不上行而口舌乾燥用防己椒目葶蘆利水散
結氣而葶蘆尤能利陽然腸胃受水穀之氣者邪

實腹滿非輕劑所能治必加大黃以瀉之若口中
有津液而仍作渴者此痰飲聚於血分必加芒消
以祛逐之

先渴後嘔爲水停心下此屬飲家小半夏茯苓湯主
之

先渴者因痰飲占據中宮津液不得灌注於上肺
失其潤而後嘔者胃中所積之飲隨氣逆而上
泛也故用薑半以滌飲茯苓以滲溼溼去則嘔止
津通而渴自已此與傷寒心下有水氣欬而微喘

發熱不渴。服小青龍湯已而渴之義。懸殊。彼以津液耗損而渴。此以痰氣積阻而渴。渴之先後變見。可以推飲之盛衰也。世以半夏性燥。渴家禁用。曷知其有主渴之妙用哉。

假令瘦人。臍下有悸。吐涎沫而顛眩。此水也。五苓散主之。

瘦人本無痰溼。今顛眩吐涎。明是水積臍下而悸。故用五苓。藉桂之辛溫以散之也。

久欬數歲。其脉弱者。可治。實大數者。死。其脉虛者。必

苦冒其人本有支飲在胸中故也。治屬飲家。

下半條專補心下支飲冒眩之脈法。冒屬風虛。必無脈實之理。治屬飲家。不特澤瀉湯一方也。

丹溪曰。痰之源不一。有因痰而生。熱者有因熱而生。痰者有因氣而生者。有因風而生者。有因驚而生者。有積飲而生者。有多食而成者。有因暑而生者。有傷冷物而成者。有脾虛而成者。有嗜酒而成者。其爲病也。驚痰則成心包痛。顛疾。熱痰則成煩躁。驚悸。風痰成癱瘓。大風眩暈。飲痰成嘔吐。脇痛。四肢不舉。食痰。

成瘡痢口臭。痞塊滿悶。暑痰成嘔。逆眩冒冷。痰成骨
痺。氣刺痛。四肢不舉。酒痰多成脇痛。臂痛。飲酒不消。
但得酒久。日又吐。脾虛生痰。食不美。反胃嘔吐。溼痰
多。倦怠軟弱。氣痰攻注。走刺不定。婦人於驚痰最多。
結成塊者。爲驚痰。必有一塊在腹。發則如身孕。轉動
跳躍。痛不可忍。又有老痰凝結膠固。非借溫藥引導。
必有拒格之患。龐安常有言。人身無倒上之痰。天下
無逆流之水。故善治痰者。不治痰而治氣。氣順則一
身之津液亦隨氣而順矣。○痰屬溼熱。乃津液所化。

因風寒溼熱之感。或七情飲食所傷。以致氣逆液濁。變爲痰飲。或吐咯上出。或凝滯胸膈。或留聚腸胃。或客於經絡四肢。隨氣升降。遍身上下無處不到。其爲病也。爲喘爲欬。爲惡心嘔吐。爲痞膈壅塞。關格異病。爲泄爲眩暈。爲嘈雜怔忡驚悸。爲顛狂爲寒熱。爲痛腫。或胸間漉漉有聲。或背心一點常如冰冷。或四肢麻痺不仁。皆痰所致。百病中皆有兼痰者。世所不知也。痰有新久輕重之殊。新而輕者。形色清白。氣味亦淡。久而重者。黃濁稠粘。欬之難出。漸來惡味。酸辣腥

燥鹹苦。甚至帶血而出。治法痰生於脾胃。宜實脾燥濕。又隨氣而升。宜順氣爲先。分導次之。又氣升屬火。順氣在於降火。熱痰則清之。濕痰則燥之。風痰則散之。鬱痰則開之。頑痰則軟之。食痰則消之。在上者吐之。在下者下之。又中氣虛者。宜固中氣以運痰。若攻之太重。則胃氣虛而痰愈甚矣。

喻嘉言曰。內經云。諸氣臍鬱。皆屬於肺。蓋肺鬱則成熱。熱盛則生痰。痰挾瘀血。遂成窠囊。膈間脹滿痞悶。雖夏月痰飲積處無汗。而冷痰清飲積滿。窠囊必大。

嘔逆此盈科而進也多由厚味積熱腸胃枯涸又加
怫鬱胃脘之血爲痰濁所滯日積月累漸成噎膈反
胃之次第若用燥劑其結轉甚惟竹瀝薑汁韭汁可
以治之。日飲三五杯必胸中煩躁不寧乃妙後用養
血健脾潤燥藥。○治痰之法曰驅曰導曰絳曰化曰
涌曰理脾曰降火曰行氣前人之法不爲不詳至於
案囊之痰如蜂子之穴於房中如蓮實之嵌於蓬內
生長則易剝落則難其外窄中寬任行驅導絳涌之
藥徒傷他藏此實閉拒而不納耳夫人身之氣經盛

則注於絡。絡盛則注於經。窠囊之來始於痰聚胃口。嘔時數動。胃氣胃氣動則半從上出於喉。半從內入於絡。胃之絡貫膈者也。其氣奔入之急則衝透膈膜。而痰得以居之。痰入既久則阻礙氣道而氣之奔入者復結一囊也。然痰飲結聚於膈膜而成窠囊。清氣入之渾然不覺。每隨濁氣而動。乃至寒之亦發熱之亦發。傷酒傷食亦發動。怒動欲亦發。總山動其濁氣濁氣隨火而升。轉使清氣逼處不安也。故治窠囊之痰甚難。必先凝神入氣。以靜自調。薄滋味以去胃中。

之痰使胃經之氣不急奔於絡轉虛其胃以聽絡中
之氣返還於胃。逐漸以藥開導其蘖而滌去其痰則
自愈矣。○後世治痰飲有四法。曰實脾。燥溼降火。行
氣。實脾燥溼。二陳湯加蒼白二朮。最爲相宜。若陰虛
則反忌之矣。降火之法。須分虛實。實用苦寒。虛用甘
寒。庶乎可也。若夫行氣之藥。諸方漫然全無著落。謹
再明之。風寒之邪從外入內。裏其痰飲。惟宜小青龍
湯。分其邪從外出。而痰飲從下出也。濁陰之氣從下
入上。裏其痰飲。金匱半夏厚朴湯。即分其濁氣下

出而痰飲從上出也。若多慾之人。則腎氣上逆。直透
膜原。結壘萬千。臍脹重墜。不可以仰。川桂苓九引氣
下趨。痰飲始豁也。又虛寒痰飲。少壯者。十中間見一
二。老人小兒。十中常見四五。若果脾胃虛寒。飲食不
思。陰氣痞塞。嘔吐涎沫者。宜溫其中。真陽虛者。更補
其下。清上諸藥。不可用也。○再按痰飲。總爲一證。而
因則有二。痰因於火。有熱無寒。飲因於溼。有熱有寒。
卽有溫泉無寒火之理也。○痰飲膠結於胸中。爲飽
爲悶。爲頻欬。而痰不應。總爲脾失其健。不爲胃行其

津液而飲食卽以生痰。漸漬充滿肺竅。欬不易出。雖以治痰爲急。然治痰之藥。大率耗氣動虛。恐痰未出而風先入也。惟是確以甘寒之藥。杜風消熱潤燥。補虛豁痰。乃爲合法。○驚痰。堵塞竅隧。肝肺心胞絡間。無處不有。三部脉虛軟無力。邪盛正衰。不易開散。欲用涌劑。正如兵家劫營之法。安危反掌。欲導之下行。竅隧之痰。萬不能導。徒傷脾氣。計惟理脾爲先。脾氣者。人身健運之陽氣。如天之有日。陰凝四塞者。日失其所。痰迷不醒者。脾失其權。理脾則如烈日當空。片

雲纖翳能掩之乎其理脾之法須藥餌與飲食相泰不但滑膩雜食當禁卽飯食粥飲亦須少減則脾氣不用以消穀轉用之消痰較藥力萬萬耳○膏粱過厚之人每多味痰尤宜清理脾胃爲主夫五味入口而藏於胃胃爲水穀之海五藏六府之總司人之食飲太過而結爲痰涎者每隨脾氣之健運而滲灌於經隧其間往返之機如海潮然脾氣行則潮去脾氣止則潮回所以治沉痾之法但取辛熱微動寒凝已後止而不用恐痰得熱而妄行爲害不淺也不但痰

得熱而妄行。卽脾得熱亦過動不息。如潮之有去無回。其痰病之決裂。可勝道哉。從來服峻利之藥者。深夜亦欲飲食。人皆不知其故。反以能食爲慶。曾不思愛惜脾氣。令其晝運夜息。乃可有常。況人身之痰。旣由胃以流於經隧。則經隧之痰。亦必返之於胃。然後可從口而上。越從腸而下。達此惟脾氣靜息之時。其痰可返。故凡有痰證者。早食午食而外。但宜休養脾氣不動。使經隧之痰得以返之於胃。而從胃氣之上。下不從脾氣之四逆。乃爲善也。試觀痰病輕者。夜間

安卧。次早即能嘔出泄出。痰病重者昏迷復醒。及能嘔出泄出者。豈非未嘗得食。脾氣靜息。而與痰以出路耶。世之喜用熱藥峻攻者。能知此乎。噫。天下之服辛熱而轉能夜食者多矣。能因此而三覆否。

李士材云。先哲論脾爲生痰之源。肺爲貯痰之器。又曰。治痰不理脾胃。非其治也。以脾土虛則清者難升。濁者難降。留中滯膈。淤而成痰。故治痰先補脾。脾復健運之常。而痰自化矣。析而言之。痰有五。飲亦有五。治法因之而變。在脾經者。名曰淫痰。脉緩面黃。肢體

沉重嗜卧不收腹脹食滯其痰滑而易出二陳加枳
木挾虛者六君子湯酒傷者加白豆蔻乾葛在肺經
者名曰燥痰又名氣痰脈濇而白氣上喘促灑淅寒
熱悲愁不樂其痰濇而難出利金湯去枳殼加萎蕤
薑用蜜煎在肝經者名曰風痰脈弦而青肢脇滿悶
便溺秘濇時有躁怒其痰清而多泡十味導痰湯用
漿水煎服其則干絳湯加川芎大黃在心經者名曰
熱痰脈洪而赤煩熱心痛口乾唇燥時多喜笑其痰
堅而成塊涼膈散加苓半下之在腎經者名曰寒痰

脉沉而黑。小便急。痛足寒而逆。心多恐怖。其痰有黑點而多稀。桂苓丸加澤瀉。車前。腎虛水泛爲痰。八味丸其人素盛。今瘦。水走腸間。漉漉有聲。名曰痰飲。心下冷。極苓桂朮甘湯和之。飲後水流在脇下。欬唾引痛。名曰懸飲。十棗湯下之。飲水流於四肢。當汗不汗。身體疼重。名曰溢飲。內經所謂溢飲者。渴暴多飲。而溢入肌皮。腸胃之外也。小青龍湯汗之。欬逆倚息。短氣不得卧。其形如腫。名曰支飲。五苓散澤瀉湯利之。膈滿嘔吐。喘欬寒熱。腰背痛。目淚出。其人振振惡寒。

身。胸。惕。者。名。曰。伏。飲。倍。朮。九。加。茯。苓。半。夏。更。有。一。種。
非。痰。非。飲。時。吐。白。沫。不。甚。稠。粘。者。此。脾。虛。不。能。約。束。
津。液。故。涎。沫。自。出。宜。用。六。君。子。湯。加。炮。薑。益。智。仁。以。
攝。之。嗟。乎。五。痰。五。飲。證。各。不。同。治。法。迥。別。至。於。脾。肺。
二。家。之。痰。尤。不。可。混。脾。爲。溼。上。喜。溫。燥。而。惡。寒。潤。故。
白。朮。半。夏。茯。苓。爲。要。藥。肺。爲。燥。金。喜。涼。潤。而。惡。溫。燥。
故。門。冬。貝。母。桔。梗。爲。要。藥。二。者。誤。治。鮮。不。危。困。每。見。
世。俗。畏。半。夏。之。燥。喜。貝。母。之。潤。一。見。有。痰。便。以。貝。母。
投。之。若。是。脾。痰。則。土。氣。益。傷。飲。食。漸。減。矣。卽。使。肺。痰。

毋過於涼潤以傷中州。稍用脾藥以生肺金。方爲善治。故曰治痰不理脾胃。非其治也。信夫。

凡人身中有塊不癢不痛。或作麻木。名敗痰失道。宜隨處用藥消之。如忽患手足胸背頭項腰膝疼痛。不可忍。及連筋骨牽引吊痛。坐卧不安。走易不定。頭疼困倦。手足重墜。痺冷脉伏。此乃涎飲頑痰。伏在心胸上下。發爲此疾。非風非毒。導痰湯加羌防白芷薑汁竹瀝。痰火相煽於膈上。胸中時覺痞滿眩暈。或目齒疼。飲食後稍覺快爽。少間復加迷悶。大便或結或

瀉小便或赤或清此皆痰飲或開或聚之故治宜健
脾以運痰清肺以潤燥六君子加蘇子瓜蒌薑汁竹
瀝之類○老痰積於胸膈作痞或流滯於經絡四肢
者青礞石丸○壯實體厚之人可用薑汁竹瀝下滾
痰丸然後用理脾行氣藥調理○溼痰積於脇下隱
隱作痛天陰疼軟更甚輕則二陳湯加白芥子重則
控涎丹緩攻之○痰挾死血隨氣攻注流走刺痛有
時得熱則止有時得熱轉劇此本寒痰阻塞故得熱
則止若痛久火邪傷血則得熱轉劇控涎丹加胡椒

蠟尾木香陵鯉甲痛定時局方七氣湯與六君子並
加竹瀝相間服之。○痰在脇下非白芥子不能達。○
痰在四肢及在皮裏膜外非竹瀝薑汁不行。二味治
陰虛有痰。大有奇驗。但食少脾胃不實者不可輕用。
以其寒滑能走大便也。○枳實治痰能衝墻倒壁。黃
芩花粉大降膈上熱痰。然能鬱遏火邪。傷損中氣。脾
胃虛寒及有外感者切忌。○痰在膈間使人顛狂健
忘。四肢偏枯。及類中風痰俱用竹瀝。○痰在腸胃可
下而愈。枳實大黃芒硝之類。○膈上痰熱痞悶小陷。

胸湯加枳實茯苓薑汁竹瀝。○中脘留伏痰飲臂痛難舉手足不能轉移背上凜凜畏寒者指迷茯苓丸。○痰飲流入四肢令人肩背痠痛兩手軟痺若誤以爲風則非其治導痰湯加薑黃木香不應加桂枝以和營氣。○眼黑而行步呻吟舉動艱難者痰入骨也。非川草薺苦參不除其病遍體骨節疼痛審氣血加化痰藥。○溼痰痞塞胸中不快氣不宣通及痰火吐痰不見血者沉香化痰丸。○肥盛多溼熱人痰溼膠固於中外動則喘滿眩暈者運痰丸。○老痰不化喉

中常覺哽塞。咯之不出者。消痰餅子。○喉中有物。咯
不出。嚥不下。或作刺痛。此是鬱痰。四七湯。脉滿者。卒
難得開。必費調理。○多思慮人。胃中虛寒。飲聚食減。
者。局方七氣湯。深師消飲丸。選用。○心胃中有寒痰。
宿水。自吐出水後。心胸間虛氣滿。不能食。外臺茯苓
丸。○寒涎沃膽。時吐痰水。不得眠。或時眩暈。溫膽湯。
多驚加蠟尾。○痰火盛於上焦。氣盛喘促。有時能食。
有時不能食。或周身走痛。飽悶痞脹者。用滾痰丸。西
北人倒倉法最妙。○病人久虛。內有宿積痰飲。用參

木補之久乃吐出臭痰或綠色痰者難治蓋積之既久而脾胃虛熱不運且有積熱故鬱臭耳急用二陳加枳木黃連竹瀝庶可十全一二若肺癰吐臭痰膿血不在此例○脾肺氣虛不能運化而有痰者六君子加木香○肺胃氣虛不能清化而有痰者六君子加桔梗○脾氣虛不能運化而生痰者理中丸加半夏茯苓○脾中氣滯而痰中有血者加味歸脾湯去木香遠志加牡丹皮砂仁○肝經血熱而痰中有血者加味逍遙散去柴胡煨薑加童便藕汁○肝腎陰

虛而痰中有血者六味丸加烏鰂骨茜根○若過服寒涼唾痰有血者異功散加炮薑○痰飲結聚腹脇之間有類積聚但按之不甚堅而時時口吐涎沫者六君子合五苓加枳實○平居無事但有痰數口或清或堅宜小半夏茯苓湯不應加人參以健胃氣則痰自不生矣○陰血不足相火上炎肺受火乘不得下行化令由是津液凝滯生痰不生血當用潤劑如二冬膏六味丸之類滋其陰使上逆之火得返其它而息則疾自消投以二陳等湯立見其始瘦人多此

○腎虛不能納氣歸源出而不納則爲積滯積滯不散則痰生八味丸肥人多此○老人腎虛水泛爲痰上湧者八味丸以攝之不應用真武湯○凡尺脉浮大按之則濇氣短有痰小便赤濇足跟作痛皆腎虛不能行濁氣凝聚而爲痰也腎氣丸○脉來細滑或緩痰涎清薄身體倦怠手足痠軟此脾虛挾溼六君子加炮薑或補中益氣加半夏茯苓然痰病須辯有火無火無火者純是清水有火者中有重濁白沫耳○內傷中氣虛而有痰必用參朮佐以薑汁傳送甚

者加竹瀝。○脾氣虛宜清中氣以運痰使之下行。六
君加枳朮兼用升柴以提清氣。○脉濡緩身體倦怠
體厚人屬溼痰。二陳加生朮羌活氣虛佐參朮。○脉
沉滯或滑證兼惡心心下飽悶屬鬱痰宜開鬱行氣。
○脉滑見於右關時常惡心吐清水痞塞就吐中以
鵝翎探之蓋熱痰在膈上瀉亦不去必用吐膠固稠
濁非吐不開浮滑宜吐脉濇年高虛人不可吐痰在
經絡中非吐不可吐中就有發散之意須先升提其
氣乃吐如瓜蒂防風川芎桔梗芽茶蘼汁之類晴明

時於不通風處以布緊勒其肚乃吐。○腎虛水泛爲痰。有用腎氣丸。屢未得効。因思痰本陰類。復用地黃助陰。良非所宜。當於方中減熟地。黃山茱萸。加菖蒲沉香。開通其氣。自効。大抵陰虛痰燥。切忌二陳六君輩香燥益氣藥。陽虛飲泛。切戒四物六味滋陰膩膈藥。此岐路攸分。不可不辯。○大凡痰飲變生諸證。不當爲諸證牽掣作名。且以治飲爲先。飲消諸證自愈。如頭風眉稜骨痛。累用風藥不効。投以痰劑收功。如患眼赤羞明而痛。與涼藥弗瘳。界以痰劑獲効。凡此

之類不一而足。散在各門。不復繁引。

診○脉沉者有留飲。雙弦者寒也。偏弦者飲也。肺飲不弦。但苦喘滿。短氣支飲亦喘。不得卧。短氣。其脉平也。病人一臂不遂。時復移在一臂。其脉沉細。非風也。必有飲在上焦。痰得滿。脉難愈。陳無擇云。飲脉皆弦。細沉滑。左右關脉浮大。而實者。膈上有稠痰也。宜吐之。病人百藥不効。關上脉伏而滑者。痰也。眼胞上下如煤黑者。亦痰也。

唾○唾者坐處不時多唾。此胃中寒也。以胃氣虛寒。

不運。故病後多有是證。理中湯或六君子湯加益智仁攝之。

虞恒德治一婦。因多食青梅得痰病。日間胸膈痛如刀錐。至晚胸中痛止。而膝胸大痛。此痰飲隨氣升降故也。服丁沉薑桂烏附諸藥皆不効。乃以萊菔子研汁與半碗吐痰半升。至夜痛尤甚。而厥此引動其猖狂之勢耳。次日用參蘆一兩。逆流水煎服。不吐。又次日苦參煎湯服。亦不吐。又與附子尖。桔梗蘆皆不吐。後一日清晨用藜蘆末一錢。麝香

少許。酸漿水調服。始得大吐稠痰。升許其痛如失。調理脾胃而安。

錢仲立治一人。素患痰火。外貌雖癯。稟氣則實。醫者誤認虛火。而用補中益氣。氣喘上升幾殆。遂用二陳探吐。出痰碗許。始得安寢。仍用二陳去半夏。加硝黃下結糞無數。其熱始退。調理脾胃而安。

王中陽治江東富商。自奉頗厚。忽患心驚。如畏人捕。聞脂粉氣。卽便遺泄。坐臥欲人擁護。遍身紅暈。紫斑。兩腿連足。淫溼損爛。膿下不絕。飲食倍常。酬

應不倦。屢以驚悸虛脫風瘡治。皆不効。王診得大
脉俱長。三部有力。此係太過之脉。心腎不交。而上
悸下脫。皆痰飲留積所致。風瘡亦是痰飲流入經
隧。內溼招風之故。先以滾痰丸。遂去痰毒。二日一
次。然後用豁痰藥。加減調理而安。

薛立齋治一人。背腫一塊。按之則軟。肉色如故。飲
食如常。勞則吐痰。此脾虛而痰滯。用補中益氣加
茯苓半夏羌活。外以香附末薑汁調餅炙之而散。
後因勞役頭眩作嘔。仍以前藥減羌活加蔓荊子。

而愈。

李士材治秦景明。素有痰飲。每歲必四五發。發卽嘔吐不能食。此病久結成窠。囊非大涌之弗愈也。須先進補中益氣。十日後以瓜蒂散頻投。涌如赤豆沙者數升。已而復得水晶色者。升許如是者七補之。七涌之。百日而窠囊始盡。端服六君子八味丸。經年不輟。

又治朱文哉。遍體如蟲螫。口舌糜爛。寅卯必見二鬼執盤。食以獻其脉。兩關弦滑且大。定爲痰飲之

疴投淡痰丸一服微有所下更以控涎丹下痰及積身痛減半更以參朮煎湯送控涎丹復下數行而愈

石頑治周又輜張使本燕人體肥痰盛善肉善飯而患痰鳴喘嗽數年食傷恆發發則六脉遲滑時見歇止聲如拽鋸遍地皆痰每歲或一二發或三五發深秋初冬尤甚遂用倒倉法自言肢體皆轉前證遂不復作二年後因不禁牛肉復發然其勢較前不過十一是亦不慎口腹所致耳

欬嗽

素問云。肺之令人欬何也。五藏六府皆令人欬。非獨肺也。皮毛者。肺之合也。皮毛先受邪氣。邪氣以從其合也。其寒飲食入胃。從肺脉上至於肺。則肺寒。肺寒則外內合邪。因而客之。則爲肺欬。肺欬之狀。欬則喘。息有音。甚則唾血。心欬之狀。欬則心痛。喉中介介如梗狀。甚則咽腫喉痺。肝欬之狀。欬則兩脇下痛。甚則不可以轉。轉則兩肋下滿。脾欬之狀。欬則右脇下痛。陰陰引肩背。甚則不可以動。動則欬劇。腎欬之狀。欬

則腰背相引而痛。其則欬逆。五藏之久欬。乃移於
六府。脾欬不已。則胃受之。胃欬之狀。欬而嘔。嘔甚則
長蟲出。肝欬不已。則膽受之。膽欬之狀。欬而嘔。膽汁。肺
欬不已。則大腸受之。大腸欬之狀。欬而遺矢。心欬不已。
則小腸受之。小腸欬之狀。欬而失氣。氣與欬俱失。腎欬
不已。則膀胱受之。膀胱欬之狀。欬而遺溺。久欬不已。則
三焦受之。三焦欬之狀。欬而腹滿。不欲食飲。此皆聚於
胃。關於肺。使人多涕唾。而面浮腫。氣逆也。

岐伯雖言五藏六府皆令人欬。其所重全在肺胃。

而尤重在外內合邪四字。人身有外邪有內邪有外內合邪。此云五藏之久欬。乃移於六府。是指內邪鬱發而言。若外邪入傷肺合而欬。原無藏府相移之例也。

金匱云。欬逆倚息不得臥。小青龍湯主之。○小青龍湯下已。多唾口燥。寸脉沉。尺脉微。手足厥逆。氣從小腹上衝胸咽。手足痺。其面翕熱如醉狀。因復下流陰股。小便難。時復冒者。與桂苓五味甘草湯治其衝氣。○衝氣即低。而反更欬胸滿者。用桂苓五味甘草湯去

桂加乾薑細辛以治其欬滿。○欬滿卽止而更復渴。衝氣復發者以細辛乾薑爲熱藥也。服之當遂渴而渴反止者爲支飲也。支飲者法當冒。冒者必嘔。嘔者復內半夏以去其水。○水去嘔止其人形腫者加杏仁主之。其證應內麻黃以其人遂痺故不內之。若逆而內之者必厥。所以然者以其人血虛麻黃發其陽故也。○若而熱如醉此爲胃熱上衝薰其面加大黃以利之。

按金匱治欬叙之痰飲之下以欬必因之痰飲而

五飲之中。獨膈上支飲。最爲欬嗽根底。外邪入而合之。因嗽。卽無外邪。而支飲漬入肺中。自足令人欬嗽不已。況支飲久蓄膈上。其下焦之氣逆衝而上。尤易上下合邪也。夫以支飲之故。而令外邪可內下邪可上。不去支飲。則欬終無寧宇矣。其曰欬逆倚息不得臥。小青龍湯主之。明外內合邪之證。惟小青龍湯爲的對耳。然用小青龍湯。其中頗有精義。須防衝氣自下而上。重增濁亂。其欬不能堪矣。傷寒用小青龍湯。無少陰證者可服。雜證用小

青龍湯亦恐少陰腎氣素虛。衝任之火易於逆上。衝任火上。無欬且增煩欬。况久欬不已。顧可動其衝氣耶。蓋衝任二脉與腎絡同出胞中。腎虛不能固守於下。則二脉相挾。從少腹逆衝而上也。蓋腎氣本虛之人。卽素無痰飲。纔感外邪。則衝任之火便乘勢上凌膈上。迫脇津液而爲痰飲。支塞清道。心至欬逆倚息不得卧也。倚息者。倚伏而喘息。陰火內應外邪。爲證最急。不得不以小青龍爲務也。祇緣真元素虧。縱有合劑。不能遲迅掃之力。所以

餘邪得以久持。致有如下變證也。多唾。飲上溢也。口燥。津液傷也。寸脉沉。尺脉微。手足逆冷。衛中陽氣耗也。氣從少腹上衝胸咽。陰火逆也。手足痺。營血虛也。其面翕熱如醉狀。陽明胃熱也。因復下流陰股。小便難。陰火下流膀胱也。時復冒。太陽餘邪未散也。然證雖屢變。皆爲衝氣逆上之故。且有時復昏冒一證。卽定太陽表證。確守冒家汗出自愈之例。故反覆出入。不離小青龍加減。所以用桂苓五味甘草湯。先治衝氣。衝氣卽低。而石更欬胸滿。

因水在膈間不散。再變前方。去桂加乾薑細辛。以治其欬滿。欬滿卽止。第三變。而更復渴。衝氣復發者。以細辛乾薑爲熱藥也。服之當遂渴。而渴反止者。爲支飲也。支飲者。法當冒。冒者必嘔。嘔者復內半夏以去其水。水去嘔止。第四變。其人形腫者。以水尚在表也。加杏仁主之。其證應內麻黃。以其人遂痺。故不內之。若逆而內之。必厥。所以然者。以其人血虛。麻黃發其陽故也。第五變。若面熱如醉。此爲胃熱。上衝薰其面。加大黃以利之。前四變。隨證

加減施治。猶未離本來繩墨。至第五變。其證頗似
戴陽。而能獨斷陽明胃熱。乃加大黃以利之。按陽
明病。面合赤色。不可攻之。爲其腎虛。陽氣不藏。故
以攻下爲戒。而此平昔陰虧血虛。反用大黃利之
者。以其證變。雖有面熱如醉。脉見寸沉尺微。
洵非表邪怫鬱。而爲胃中熱。無疑。竟行滌飲攻
熱。恬不以陰虛爲慮。而致扼腕也。嗟夫。仲景治欬
全不從欬起見。治其支飲。下其逆氣。衝氣法中之
法。游刃有餘矣。

欬而上氣。喉中水雞聲。射干麻黃湯主之。○欬而脉浮者。厚朴麻黃湯主之。○欬而脉沉者。澤漆湯主之。上氣而作水雞聲。乃是痰礙其氣。氣觸其痰。風寒入肺之一驗耳。發表下氣潤燥開痰四法萃於一方。用以分解其邪。若欬而脉浮。則外邪居多。全以散邪爲主。用法卽於小青龍湯中除去桂枝芍藥。甘草加厚朴石膏小麥。仍從肺病起見。以桂枝之熱芍藥之收。甘草之緩。槩示不用而加厚朴以下氣。石膏以清熱。小麥以引入胃中。助其升發之氣。

也。若欬而脉沉爲邪在營分。卽肺之裏也。熱過於營。吸而不出。其血必結。血結則痰氣必外裏。故用澤漆之破血爲君。加入開痰下氣清熱和營諸藥。俾壘一空。元氣不損。製方之妙若此。

火逆上氣咽喉不利者。止逆下氣。麥門冬湯主之。

此胃中津液乾枯。虛火上炎之證。凡肺病有胃氣則生。無胃氣則死。胃氣者肺之母氣也。故於竹葉石膏湯中偏除方名二味。而用麥冬數倍爲君。兼參草粳米以滋肺母。使水穀之精微皆得上注於

肺自然沃澤無虞。當知火逆上氣皆是胃中痰氣。不清上溢肺隧。占據津液流行之道。而然。是以倍用半夏。更加大棗。通津滌飲爲先。奧義全在乎此。若濁飲不除。津液不致。雖日用潤肺生津之劑。烏能建止逆下氣之勩哉。俗以半夏性燥。不用。殊失仲景立方之旨。

戴人云。肺爲諸竅之門戶。每爲六氣所乘。如風乘肺者。日夜無度。汗出頭痛。痰涎不利。熱乘肺者。喘急而嗽。面赤潮熱。甚者熱甚於中。手足反寒。熱移於下。便

泄無度。火乘肺者。欬喘上壅。出血甚者。七竅血溢。燥
乘肺者。氣壅不利。百節內痛。頭面汗出。寒熱往來。皮
膚乾枯。燥癢。大便秘。痰膠血腥。寒乘肺者。欬急而喘。
惡寒無汗。鼻塞身疼。發熱煩躁。溼乘肺者。痰涎不利。
面腫喘急。至於溼痰內動。爲欬。又必因風。因火。因熱。
因寒。所挾各不相同。至於乘肺則一也。

欬嗽外感六氣。鬱而成火。必六淫相合。內傷五藏。相
勝必五邪相併。有此不同。而中間又有欬散二法。欬
者。謂收斂肺氣也。散者。謂解散寒邪也。宜散而欬。則

肺受寒邪一時飲住爲害非輕宜飲而散則肺氣怯弱一時發散而走泄正氣害亦非小且如感風欬嗽已經散後其表虛復感寒邪虛邪相乘又爲喘嗽若欲散風則愈虛其肺收飲則愈滯其邪當先輕解漸收飲之肺不致虛邪不致滯欬嗽自止矣

經言藏府皆有欬嗽屬肺何爲藏府皆有之蓋欬嗽爲病有自外而入者有自內而發者風寒暑溼先自皮毛而入皮毛者肺之合故雖外邪欲傳藏亦必先從其合而爲嗽此自外而入者也七情鬱結五藏

不和則邪火逆上。肺爲氣出入之道。故五藏之邪上蒸於肺而爲欬。此自內而發者也。然風寒暑溼有不爲嗽者。蓋所感者重。竟傷藏府。不留於皮毛。七情亦有不爲嗽者。蓋病尚淺。止在木藏。未卽上攻。所以傷寒以有嗽爲輕。而七情鬱結之嗽。久而後見。治法當審脉證三因。若外因邪氣止當發散。又須原其虛實。冷熱。若內因七情。與氣口脉相應。當以順氣爲先。下痰次之。

戴復菴云。欬嗽因風寒者。鼻塞聲重。惡寒者是也。火

者有聲痰少而赤者是也。勞者盜汗出兼痰者多作寒熱肺脹者動則喘滿氣急息重痰者嗽動便有痰聲痰出嗽止五者大槩耳亦當明其是否也。

趙養葵曰。欬謂無痰而有聲。肺受火燥也。嗽是有聲而有痰。脾受濕傷也。雖分五藏六府之殊。而其要皆主於肺。蓋肺爲清虛之府。一物不容毫毛必欬。又肺爲嬌藏。畏熱畏寒。火刑金燥故嗽。水冷金寒亦嗽。故欬嗽者必責之肺。而治法不在於肺而在於脾。不專在脾而反歸重於腎。蓋脾者肺之母。腎者金之子。故

虛則補其母。虛則補其子也。○勞嗽見血。有勞傷元氣。內火妄動而傷肺者。亦有勞傷腎水。陰火上炎而傷肺者。有因過服天冬生地黃等寒藥。損傷脾胃。不能生肺氣而不愈者。有因誤服知藥之類。損傷陽氣。不能生陰精而不愈者。凡此皆脾肺虧損而腎水不足。以致虛火上炎。真藏爲患也。須用異功散加門冬五味。補脾土而生肺金。用六味丸滋腎水而生陰精。否則不救。○凡陰虛火盛。乾欬少痰。及痰咯難出之嗽。妄用二陳湯。轉劫其陰而生大患矣。

張介賓云。大法欬嗽治表邪者。藥不宜靜。靜則留連不解。變生他病。故忌寒涼收斂。經所謂肺欲辛者是也。治裏證者。藥不宜動。動則虛火不寧。燥癢愈甚。故忌辛香燥熱。所謂辛走氣。氣病無多。食辛是也。然治表者。雖宜動以散邪。若形病俱虛者。又當補中氣而佐以和解。倘專於發散。則肺氣益弱。腠理益疎。邪乘虛入。病反增劇也。治內者。雖當靜以養陰。若命門火衰。不能歸元。則參朮桂附在所必用。否則氣不化水。終無濟於陰也。至若因於火者。宜清。因於溼者。宜利。

因痰者降其痰。因氣者理其氣。隨其所見之證而兼以調之。大抵風邪胃火此實熱爲患。易治。惟肺腎虧損此真藏爲患。最難治。在老人虛人皆宜溫養脾肺。稍兼治標爲常。

石頑曰。經云。勞風法在肺下。其爲病也。使人強上冥視。唾出若涕。惡風而振寒。此爲勞風之病。治之以救俯仰。巨陽引句。精者三日。中年者五日。不精者七日。欬出青黃涕。其狀如膿。大如彈丸。從口中若鼻中出。不出則傷肺。傷肺則死也。此段與義從無正釋。今特

明之夫人勞力則肺氣脹滿俞穴大開而汗泄斯時
感冒風邪乘其俞穴之開直入肺下少頃俞穴仍閉
其邪有入無出鬱閉不通而生痰聚飲流入膈胸肩
背經絡竅隧之中故使人強上冥視強上者身半以
上爲風所中而胸背強戾但可仰卧而不能俯非若
腎風之不能正偃也冥視者邪害空竅所以目睛反
戾半開不動不能視物也唾出若涕者痰飲上溢之
徵也惡風振寒者肺氣受困木邪反肆爲虐也風寒
之邪必由巨陽而尋出路今邪在肺下逼近胃口旣

不能從表面解。又非實熱燥結。可攻下而除。勢必借資膀胱陽氣。上吸胸中。使陰虛鬱閉之邪。庶得從上解散。本乎天者。親上。故涕從口鼻而出。其色青黃。其狀如膿者。風邪挾肝膽而乘脾胃之候也。大如彈丸者。乃久已支寒肺竅之結痰。見邪畜之盛也。設不急治。則傷肺而死矣。故治此證者。當急使巨陽之上引。則肺氣清肅下行。而風邪痰涕方得上出。胸中既空。洞無餘。自然俯仰無礙矣。又須知此證邪氣入深。即使治得其當。雖精壯之人。亦必服藥三日始得見効。

若治中年者及不精壯者更須五日七日爲期設遇
羸老困憊之人胃氣寢衰不能行其藥力何能計日
取効哉。治此者惟金匱桂苓五味甘草湯加薑汁竹
瀝差堪對證。蓋桂枝上散肺下邪風下通膀胱陽氣。
茯苓先升後降專祛肺下濁飲。五味約束桂枝辛散。
使津液不隨氣外泄而爲巨陽之嚮導。甘草之甘緩。
使三味緩留膈上共成匡濟之功。若痰逆勢甚者又
當用桂枝二越婢一湯。小青龍加石膏湯。稟氣素虛
者炙甘草湯皆爲合劑。奈何守真宣明論特舉芎枳

丸專治此證。未審何所見而云然。是予不敢附會也。凡欬嗽。飲水一二口而暫止者。熱嗽也。呷熱湯而暫停者。冷嗽也。治熱嗽以小柴胡加桔梗。冷嗽理中湯加五味。○感風者。鼻塞聲重。傷冷者。淒清怯寒。挾熱爲焦煩。受溼爲纏綿。瘀血則隔間腥悶。停水則心下怔忡。或實或虛。痰之黃白。唾之稠粘。從可知也。○感風而嗽者。脉浮惡風。自汗。或身體發熱。鼻塞。或鼻流清涕。欲語未竟而欬。宜桂枝湯加香豉。細辛。然火嗽亦有鼻流清涕。語未竟而欬者。但風則一嗽便多稠。

痰火則頓欬無痰爲明辯耳。○感寒而嗽者脉緊惡寒發熱無汗鼻寒遇寒則欬內有鬱熱痰結也。華蓋散兼喘九寶湯。暴感風寒二氣相兼而欬嗽鼻塞聲重者芎蘇散。肺感風寒欬嗽倚息不得卧背寒則嗽甚小青龍湯。桂苓五味甘草湯各隨方下變證加減。客邪傷肺久嗽不止寧嗽化痰湯。○形寒飲冷欬嗽兼腹痛脉弦者小建中湯加桔梗以提肺氣之陷寒熱自汗加黃耆。○冬月嗽而發寒熱謂之寒嗽小青龍湯加杏仁。○冷熱嗽因增減衣裳寒熱俱感遇乍

寒乍熱亦嗽。飲熱飲冷亦嗽。脉浮風重。金沸草散。脉數或瀉熱重。葳蕤湯。去川芎加香豉三錢。○人房汗出中風嗽而面赤。內經謂之內風。脉浮緊。小青龍脉沉緊。真武湯。○飲酒中風多汗而嗽。謂之漏風。桂枝湯加澤瀉。木麻黃根。○水腫脉浮自汗。喘嗽便秘。小青龍加葶藶木香。○喘嗽脉沉畏寒。生料濟生腎氣丸煎服。○有先傷風嗽未除。更傷於熱而嗽聲嘶者。爲熱包寒。葳蕤湯加減。○有素嗽人更感於寒而嗽聲啞者。爲寒包熱。金沸草散去芍藥加石

膏不應用越脾湯。○熱嗽失音多服寒劑聲愈不出者。古今錄驗續命湯發之。輕則消風散去。燼蠶蟬蛻。加桔梗薄荷。以生薑汁調服。冷熱嗽失音尤宜。○夏月嗽而發熱者。小柴胡加石膏。知母。但手足心熱而不發熱者。渴白散加橘紅。桔梗不應。涼膈散去硝黃。加葳蕤蜂蜜。○傷熱而嗽者。脉數煩渴引飲。咽喉乾痛。鼻出熱氣。喉聲不清。欬唾稠粘。其痰屢欬而難出。色黃且濃。或帶血縷。或出血腥臭。或堅如蜆肉。不若風寒之嗽。痰清而白也。葳蕤湯。風熱相兼。加減葱白。

香豉湯。○凡欬嗽面赤胸腹脇常熱。惟手足乍有涼時。其脉洪者。熱痰在膈上也。小陷胸湯。○感溼嗽者。脉細而緩。身體重著。骨節煩疼。或自汗。或小便不利。麻黃加朮湯。○有一嗽痰卽出者。脾濕勝而痰滑也。有連嗽十數聲。痰不卽出者。肺燥勝而痰濇也。欬而無痰者。以甘寒潤其肺。痰多致嗽者。以辛平燥其脾。○形盛自汗。脉緩體重。嗜卧之人。欬者。脾溼勝也。二陳加防己黃耆白朮之類。兼食積痰垢壅塞不利者。干絳湯蕩滌之。兼食積痰氣蘊。懷火邪者。二陳加枳

木黃連消導之。○秋深傷熱欬嗽而洒淅惡寒發熱者千金麥門冬湯。但嗽無寒熱痰不得出極力啗之。乃得一絲粘痰者千金五味子湯。○欬而無聲者肺氣傷而不清乃痰鬱火邪在中不能上出此肺燥也。桔梗湯加貝母葶藶蜜炙枇杷葉。○潔古云欬而無痰者以辛甘潤其肺蜜煎薑橘蜜燒連皮胡桃。虛人當用人參同蜜燒胡桃不時細嚼或二味煎服最妙。卽觀音應夢散。○久嗽聲颯者古法用酥蜜膏今改用生地黃煎取辛以潤之。○欬嗽聲啞氣促滿悶語

聲不出者心包火盛而肺氣受傷也。古法用通聲膏。今改用千金地黃煎。取潤以泄之。蓋聲。雖云金實。不鳴。久嗽。多緣肺氣枯槁。是當清潤爲主。實則二陳。枯薄。葳蕤。蜜煎薑橘之類。枯則生脉。二冬。欬冬。竹茹。亦加蜜煎薑橘。又當詳形氣之肥瘠。時令之寒暄。而爲施治。聲啞。須分暴久。暴多寒鬱熱邪。而肺絡壅塞。久多熱傷肺痿。而真氣受傷。壅則麻杏甘石。苓半薑橘等。隨微甚。以搜滌之。傷則異功生脉。保元。參脉。證以培養之。若風熱心煩。欬喘便秘。脾胃熱壅。食不下。

者千金地黃煎主之。不可拘於成則而廢活法也。若喘欬失血聲嘶音啞食少便泄之金破不鳴岐彭不能圖治也。其生薑治欬嗽聲啞惟暴嗽寒鬱肺氣不通者爲宜。若久嗽熱傷肺氣而暗者雖二冬二母二地黃芩花粉等寒涼歛肺爲之禁劑而麻杏辛桂辛散耗氣亦爲戕戕其訶子五味酸濇固氣尤須慎詳。壅嗽聲重痰稠或欬有血以薄荷生胡麻各一撮細嚼煎蘇子降氣湯送下。七情饑飽嗽動傳藏府正氣致邪上逆結成痰涎肺道不利四七湯加杏

五味人參阿膠麥冬○勞心思慮心血耗散人每
有思慮則心火上乘必發乾欬此爲神傷雖服藥亦
難取効以歸脾湯加麥冬五味作膏蜜收其木香或
減半或換砂仁另爲細末離火加入不時滋養方妙
○大抵乾欬乃燥氣乘肺屬火鬱證乃痰鬱火邪在
肺先用逍遙散加苦桔以開之後用六味丸加五味
以補之不已則成勞此證不得志者有之○欬嗽痛
引肩背雖久不已不可誤認爲虛此屬三焦鬱火加
味逍遙散濁痰加味導痰湯如欬而脇痛宜疎肝氣

枳殼煮散或去川芎加青皮柴胡香附薑汁之屬肥
盛氣實者二陳湯加白芥子○火熱欬嗽喉啞痰濃
或大便秘結者涼膈散加桔梗○凡內傷氣虛不能
上輸於肺而時嗽時止其人黃白少神脉亦虛微少
力補中益氣去升麻加煨葛根麥冬五味或兼腎水
不足前湯送下都炆丸○欬嗽痰中見血而脉細者
此火邪傷血分也歸脾湯若痰中微有少血或血絲
此肝血傷也補中益氣去升麻加白芍丹皮○前後
心脹喉中有血腥氣氣口脉濡此膈間有畜血也試

法。呷熱薑湯。作呃者。瘀血也。犀角地黃湯。加童便。桃
仁大黃。攻散之。或平胃合越鞠。加韭汁。童便。消伐之。
氣竭肝傷而欬。嗽血腥者。四烏鯁骨一蘆茹丸。○內
傷瘀積在胃。不時吐血者。其人面色。稿而滯。脉多弦。
瀉當先與百勞丸。去瘀。後用異功六君調補。○有兼
停飲食而欬。須用消化之方。不可用烏梅。棗。殼。酸。瀉。
藥。其寒邪未除。宜用發散之劑。不可便用補藥。○欬
嗽而面白。悲噎。或欬白痰。白沫。屬肺胃虛寒。若胸脇
逆滿。牽引背痛。心腹冷痛。飲食卽吐者。溫肺湯。口甘。

涎沫流脉沉弦細遲屬中寒口出清水心下汪洋作
嘈雜胸脇脹痛不食屬冷飲停於胃中攻肺則欬半
夏溫肺湯兼蘆吸散亦妙○嗽而聲啞氣乏寒從背
起口中如含冰雪甚則吐血此肺氣不足胃氣虛寒
也千金補肺湯○嗽而聲啞脉細者屬寒宜半夏生
薑細辛以辛散之○如飲冷熱酒傷肺致嗽謂之湊
肺或兼煎燂傷胃欬嗽咽癢痰多唾血喘急脇痛不
得安臥改定紫菀茸湯○欬嗽嘔吐并作為肺胃俱
病先安胃氣二陳加蘆根薑汁薑製枇杷葉虛者六

君子加桔梗。有欬嗽吐痰與食俱出者。此飲食失節。脾氣不利。清濁相干。二陳加枳朮杏仁細辛。有食積痰嗽發熱。其人面青白黃色。不常面上有黃白紋痕者。二陳加香附枳殼麴蘖食積發熱。加薑汁炒川連。停寒食作嗽。加炮薑。嗽而得食。卽緩者。脾虛也。異功散有痰。六君子。外感欬嗽。與陰虛欬嗽。尤宜辯晰。外感欬嗽。則聲盛而濁。先緩後急。日夜無度。痰涎稠粘而喘急。陰虛勞嗽。則聲怯而稿。先急後緩。或早甚。或暮甚。清痰少氣而喘乏也。陰虛脈弦而

數或細數或濇證兼盜汗下午作寒熱面色純白兩
頰赤多清痰乾欬者勞也屬陰虛火盛夜服六味丸
晨服異功散○久嗽之人發散清肺俱不應胸膈不
利欬唾膿血坐卧不寧語言不出者將成肺痿之候
也紫苑散肺熱頓嗽肌膚灼熱面赤如醉者紫苑膏
微利之○治嗽須分新久虛實如久嗽脉弱或雖洪
大按之不鼓屬肺虛宜門冬五味子欬冬紫苑之類
斂而補之○酒色過度虛勞少血津液內耗心火自
炎致令燥熱乘肺咯唾膿血上氣涎潮其嗽連續不

已加以邪客皮毛入傷於肺而自背得之尤速當與
炙甘草湯或黃耆建中加丹皮蓋丹皮辛香調和營
氣治無汗骨蒸故陰虛人解表以丹皮爲嚮導○好
色之人元氣素弱欬嗽不愈喉中血腥腸中隱痛環
玉膏不應加減八味丸久服乃効○有暴嗽諸藥不
効服生料鹿茸丸卽愈此乃腎虛所致不可以暴嗽
而疑遽補之非○有便溺如常飲食不妨而欬嗽不
安或兼血腥年久不愈者此肺胃虛熱也異功散加
丹皮山藥○有肺胃虛弱欬嗽喘促或時吐血衄血

自汗盜汗者門冬清肺飲。勞嗽卽火鬱嗽因火傷迫遂成鬱遏脹滿一邊不得眠者難治。○欬嗽吐粉紅痰謂之吐血僅可綿延歲月若血色正赤如硃濃厚如漆爲守藏血不治。○有經年累月久嗽服藥不差餘無他證此是風寒客邪久伏肺胃也與勞嗽不同三拗湯佐以干縉湯瘦人多火禁用。○若饑時胸中大痛脣面上有白點如衄咽喉或癢或痛而欬不可忍脉極數或忽大忽小此必肺中有寸白蟲饑則蟲上求食痛嗽不寧也一味百部熬膏畧加檳榔

烏梅○上半日嗽多屬胃中有火竹葉石膏湯降泄之胃氣虛者補中益氣或五味異功竝加山梔午後嗽多屬陰虛六味丸加麥冬五味以斂之黃昏嗽者火浮於肺不宜用涼藥都炆丸斂而降之五更嗽甚者胃中有食積也二陳湯加枳實川連以消導之虛者六君子加薑汁炒川連○增補素問五藏六府欬治例肺欬千金五味子湯去續斷地黃赤小豆加麥門冬葳蕤細辛心欬涼膈散去硝黃加黃連竹葉肝欬枳殼煑散去芎防加肉桂橘紅蘇子脾欬六君子

湯加枳殼桔梗腎欬都炆丸加麥門冬人參胃欬異
功散加蜀椒黃連烏梅膽欬小柴胡湯加蘆根汁大
腸欬補中益氣湯去升麻加桔梗小腸欬桔梗湯加
人參茯苓橘紅五味膀胱欬五苓散加人參三焦欬
局方七氣湯加黃連枳實○久嗽服藥不應可用薰
法欬冬花將蜜拌潤焙乾入有嘴壺中燒吸烟嚥之
若胸中悶舉起頭以指掩定烟稍間再吸○杏仁散
肺中風熱然肺實有火因風寒者爲宜桑皮瀉肺氣
然性不純良虛寒者當戒補肺多用生薑以其辛能

發散也。紅蘆仁甘能潤肺寒能降火治熱嗽之要藥。陰虛血虛者勿用以其能作嘔作瀉也。○欬而吐痰膈乳痛當看痰色如何若濃濁如膿或帶血絲而臭當從肺癰例治之。

診○欬嗽之脉浮爲風緊爲寒洪數爲熱濡細爲溼寸關濇難而尺內弦緊爲房勞陰虛右關濇大爲飲食傷脾左關弦數爲疲極肝傷右寸浮短爲傷肺遲濇肺寒欬嗽洪滑爲多痰弦濇爲少血肺脉微急欬而唾血脉或沉或浮聲不損者易治脉來洪數形瘦

面赤腎藏氣衰不能上循於喉而聲啞者難療亦有
肺絡支塞而聲啞者不在此例暴病欬嗽睡臥不下
爲肺脹可治久病喘嗽左側不能臥者爲肝傷若精
力未衰者可治右邊不能臥者爲肺損無問新久皆
不可治久嗽脉弱者生實大數者死欬而脫形身熱
脉小堅急以疾爲逆不出十五日死欬脫形身熱脉
疾不過五日死欬洩血形肉脫脉搏者死欬嘔腹脹
且飧泄其脉絕不及一時而死欬嗽形羸脉形堅大
者死沉緊及伏匿者死浮直者可治浮軟者易治欬

而嘔。腹滿泄瀉。脉弦急欲絕者死。久嗽數歲其脉弱者。可治。實大數者死。其脉虛者必苦胃。其人本有支飲在胸中故也。治屬飲家。

石頑療吳江邑侯華野郭公。仲秋喘嗽氣逆。診之兩尺左關弦數。兩寸右關濡數。弦者腎之虛。濡者肺之燥。夏暑內伏。肺絡遇秋燥收之。令而發爲欬嗽也。診後公詳述病情。言每歲交秋則欬連發四載。屢欬痰不得出。則喘至夜坐不得卧。欬劇則大便枯燥有血。先曾服令高徒施元倩越脾湯。嗽卽

稍可數日間堂事勞心復欬如前時元倩歸茗松
陵諸醫治之罔効因求洞垣之鑒起我沉疴荅曰
公本東魯腎氣素強因水虧火旺陰火上燥肺金
金燥不能生水所以至秋則欬欬劇則便燥有血
肺移熱於大腸之明驗也合用千金麥門冬湯除
去半夏生薑之辛燥易以葢雞白蜜之甘潤藉麻
黃以鼓舞麥冬生地之力與越脾湯中麻黃石膏
分解互結之燥熱同一義也郭公曰松陵諸醫咸
詆麻黃爲發汗之重劑不可輕試僅用杏仁蘇子

一甘桔前胡等藥服之其效轉甚何也。荅言麻黃雖云主表。今在麥門冬湯中。不過借以開發肺氣。原非發汗之謂。麻黃在大青龍湯。麻黃湯。麻杏甘石湯。方其力便峻。以其中皆有杏仁也。杏仁雖舉世視爲治嗽之通藥。不問虛實。渾用然辛溫走肺。最不純良。耗氣動血。莫此爲甚。熬黑入大陷胸丸。佐甘遂等。搜逐結垢。性味可知。公首肯以爲然。連進二劑。是夜便得安寢。次早復診。其脉之弦雖未退。而按之稍爽。氣口則虛濡乏力。因與六味生脉加。

葳蕤白蜜作湯四服其嗽頓減郭公復云向聞元
倩有言六味八味丸中不可雜用參朮而先生居
之不疑用之輒應其義云何荅曰六味爲填補真
陰藥與人參同用原非正理此兼麥冬五味緣合
肺腎金水相生當無留中戀膈之慮善後之策卽
以此方制丸三時恆服不徹至秋庶無復嗽之虞
先是公子柔痙予用桂枝湯及六味作湯咸加蠟
尾服之而瘥其後夫人素有敗痰失道左右兩脇
俱有結塊大如覆盃發則欬嗽喘逆腹脇掣痛六

脉止促而按之少力。余用六君子加膽星枳實香附沉香二劑服之。大吐稠痰結垢一二升。因嘔勢太甚。甲夜渡湖速往。鰲明至署候之。嘔止嗽寧。脉息調勻。不必更進他藥矣。

江右督學何涵齋媳內翰范秋濤女。素常欬嗽不已。痰中間有血點。恆服童真丸不徹。秋濤歿後。哀痛迫切。欬逆倍常。而痰中雜見鮮血。因與瑞金丹四服。仍以童真丸烏骨雞丸調補而安。

又治通政勞書紳太夫人。年五十餘。素稟氣虛多

痰數日來患風熱欬逆欬甚則厄厄欲吐且宿有
崩淋近幸向安法當先治其欬因以桔梗湯加葳
蕤白微丹皮橘皮蜜煎生薑四劑撤其標證次與
六君子加葳蕤以安其胃氣繼進烏骨雞丸方療
其固疾而夫人以久不茹腥不忍傷殘物命改用
大溫經湯加麋茸角腮作丸藥雖異而功則一也

肺痿肺脹

金匱云。問曰。熱在上焦者。因欬爲肺痿。肺痿之病。從何得之。師曰。或從汗出。或從嘔吐。或從消渴。小便利數。或從便難。又被快樂下利。重亡津液。故得之。曰。寸口脈數。其人欬。口中反有濁唾涎沫者何。師曰。爲肺痿之病。若口中辟辟燥。欬卽胸中隱隱痛。脈反滑數。此爲肺癰。欬唾膿血。脈數虛者爲肺痿。數實者爲肺癰。

兩手寸口。原爲手太陰肺脈。此云寸口脈數云滑。

數云數虛云數實皆左右三部統言也其人欬口
中反有濁唾涎沫頃之遍地者爲肺痿言欬者口
中不乾燥也若欬而口中辟辟燥則是肺已結癰
火熱之毒出見於口欬聲上下觸動其癰胸中卽
隱隱而痛其脉必見滑數有力邪氣方盛之徵也
數虛數實之脉以之分別肺痿肺癰是則肺痿常
補肺癰當瀉隱然言表

肺痿吐涎沫而不欬者其人不渴必遺尿小便數所
以然者以上虛不能制下故也此爲肺中冷必眩多

涎唾甘草乾薑湯以溫之。若服湯已渴者。屬消渴。肺熱則膀胱之氣亦熱。小便必赤濇而不能多。若但吐涎沫而不欬。復不渴。反遺尿而小便數者。明非熱在上焦之肺痿。亦非重亡津液之所致。必係上焦虛冷。不能制下。以故小便無所收攝耳。此爲肺中冷。陰氣上逆。侮其陽氣。故必眩。陰寒之氣凝滯津液。故多涎唾。宜與甘草乾薑湯之甘辛以溫其脾肺也。若始先不渴。服溫藥卽轉渴者。明是消渴。飲一洩二之證。消渴又與癰疽同類。更當消息。

之矣。

喻嘉言曰。肺痿其積漸已非一日。其熱不止一端。總由胃中津液不輸於肺。肺失所養。轉枯轉燥。然後成之。於是肺火日熾。肺熱日深。肺中小管日窒。欬聲以漸不揚。胸中脂膜日乾。欬痰艱於上出。行動數武。氣卽喘鳴。衝擊連聲。痰始一應。金匱治法。非不彰明。但混在肺癰一門。况難解其精意。大要緩而圖之。生胃津。潤肺燥。下逆氣。開積痰。止濁唾。補真氣。以通肺之小管。散火熱。以復肺之清肅。如半身痿廢及手足痿。

輒治之得法亦能復起。雖云肺病近在胸中。呼吸所關可不置力乎。然肺癰屬在有形之血。血結宜驟攻。肺痿屬在無形之氣。氣傷宜徐理。兼潤肺燥。然肺雖燥而多不渴。勿以其不渴而用燥熱之藥。此辨證用藥之大法也。

肺痿涎唾多。心中溫溫液液者。炙甘草湯主之。此外臺法也。○肺痿虛寒。羸瘦緩弱。戰掉虛吸。胸滿千金生薑溫中湯。○肺痿欬唾涎沫不止。咽燥而渴。千金生薑甘草湯。○肺痿欬嗽有痰。午後熱并聲嘶者。古

法用人參養肺湯。今改用紫菀散加丹皮薑棗。心
火尅肺。傳爲肺痿。欬嗽喘嘔。痰涎壅盛。胸膈痞滿。咽
喉不利者。古法用人參平肺湯。今改用紫菀散加蘇
蕤橘紅薑棗。肺痿欬嗽不已。往來寒熱。自汗煩渴
者。古法用知母茯苓湯。今改用紫菀散加知母銀州
柴胡薑棗。蓋欬嗽聲嘶。咽喉不利。皆是火鬱痰滯。必
用生薑之辛以散之。然須蜜製。藉甘以潤之。此標本
兼該之義也。劉默生言。痿木虛燥。總不離壯木清金。
滋補氣血津液。消痰止嗽。宜天冬麥冬生地熟地。知

母人參。葳蕤。紫苑。爲主。痞結。去天冬。生地。加橘紅。蘇子。泄瀉。去天冬。生地。知母。加山藥。茯苓。并用固本丸。不時噙化。○肺痿。欬嗽。痰中有紅絲。盜汗。發熱。熱過卽冷。飲食減少者。劫勞散。○虛勞。肺痿。失音。欬唾腥血。稀痰。或面上生瘡。人參。蛤蚧散。○丹方治肺痿。每日用人參細末一錢。入猪肺管內。砂鍋中煮爛。加葱酒服効。○肺痿。欬唾咽燥。欲飲水者。自愈。張口短氣者。危。欬而口中自有津液。舌白胎滑。此爲肺寒。甘草乾薑湯。○肺痿屬熱。如欬久。肺癰。喉啞聲嘶咯血。此

屬陰虛多不可治。○肺痿六脈沉濇而急。或細數無神。脉口皮膚枯乾而氣高息麤者死。

金匱云。上氣喘而躁者。屬肺脹。欲作風水。發汗則愈。肺脹而發其汗者。卽內經開鬼門之法。一汗而令風邪外泄於肌表。水無風戰。自順趨而從下出也。欬而上氣。此爲肺脹。其人喘目如脫狀。脉浮大者。越脾加半夏湯主之。○肺脹欬而上氣。煩躁而喘。脉浮者。心下有水氣。小青龍加石膏湯主之。

按二方分治肺脹。皆以其脉浮當從汗解之例。越

脾方中有石膏無半夏。小青龍方中有半夏無石
膏。觀二方所加之意。全重在半夏石膏二味協力
建功。石膏清熱。藉辛溫亦能豁痰。半夏豁痰。藉辛
涼亦能清熱也。觀麥門冬湯方中下氣止逆。全藉
半夏入生津藥中。此二方又藉半夏入清熱藥中。
仲景加減成方。無非生心化裁。後學所當神往矣。
上氣面浮腫肩息。其脈浮大不治。又加利尤甚。
上氣之候。而至面目浮腫。喘息動肩。是肺氣壅逼。
上而不下。加以脈浮大。氣方外出。無法可令內還。

而下趨。故云不治也。加利則上下交爭。更何以堪。肺脹而欬。左右不得卧。此痰挾瘀血礙氣而脹。當歸丹皮。赤芍。桃仁。枳殼。桔梗。半夏。甘草。竹瀝。薑汁。如外邪去後。宜半夏。海石。香附。瓜蒌。甘草爲末。薑汁蜜調嚥之。

喻嘉言治施眉蒼。肺痿喘嗽吐清痰。肢體痿軟。不能舉動。脈來虛數。以蛤蚧二十枚。酒浸酥炙。人參黑參各十兩。蜜丸。時時嚥化。不終劑而痊。石頑治陸去非。肺痿聲嘶吐痰。午後發熱自汗。左

脉細數。右脉虛濡。平昔勞心。耽色所致。先與生脉散。合保元湯。次與異功散。加黃耆。竝加薑棗。與都炆丸。晨夕兼進。調補半月。而熱除痰止。月餘方得聲清。

又治孫起栢肺脹。服耗氣藥過多。脉浮大而重。按豁然。飲食不入。幸得溺清便堅。與局方七氣。每劑用人參三錢。肉桂半夏麴炙甘草各一錢。生薑四片。四劑霍然。蓋肺脹實證居多。此脉虛大不當以尋常論也。

又治一尼肺脹喘鳴肩息服下氣止嗽藥不應漸
至胸腹脹滿脉得氣口弦細而滿此必勞力氣上
悞飲冷水傷肺肺氣不能收斂所致也遂與越脾
湯減麻黃加細辛葶藶大瀉肺氣而安

又治一酒客嚴冬醉卧渴飲冷茶肺脹喘欬脉得
氣口沉緊搏指與小青龍去芍藥加葶藶半夏一
劑而痊則知肺脹喘滿當以葶藶爲嚮導也

肺癰

金匱云問曰病欬逆脉之何以知爲肺癰當有膿血吐之則死其脉何類師曰寸口脉微而數微則爲風數則爲熱微則汗出數則惡寒風中於衛呼氣不入熱過於營吸而不出風傷皮毛熱傷血脉風舍於肺其人則欬口乾喘滿咽燥不渴多唾濁沫時時振寒熱之所過血爲之凝滯畜結癰膿吐如米粥始萌可救膿成則死

肺癰之脉既云消數此復云微數者非脉之有不

同也。滑數者已成之脉。微數者初起之因也。初起以左右三部脉微。知衛中於風而自汗。左右三部脉數。爲營吸其熱而畏寒。然風入衛。尚隨呼氣而出。不能深入。所傷者不過在於皮毛。以漸舍肺俞而欬唾振寒。茲時從外入者。從外出之。易易也。若夫熱過於營。卽隨吸氣深入。不出而傷其血脉矣。衛中於風。得營中之熱。留戀固結於肺葉之間。乃致血爲凝滯。以漸結爲癰膿。是則有形之敗濁。必從瀉肺之法而下驅之。安在始萌不救。聽其膿成。

而致肺葉腐敗耶

欬逆上氣。時時唾濁。坐不得眠。皂莢丸主之。

一火熱之毒結聚於肺表之裏。之清之溫之。曾不少應。堅而不可攻。惟此無堅不入。聿成蕩滌之功。不可以藥之微賤而忽諸。若因外感所觸而成。當取用千金桂枝去芍藥加皂莢湯。最佳。足可補仲景之未遒也。

欬而胸滿振寒。脉數咽乾不渴。時吐濁唾腥臭。久久吐膿如米粥者。爲肺癰。桔梗湯主之。

此上提之法也。癰結肺中，所以濁唾腥臭，乘其新造未固，提而出之。如其勢已入裏，又當引之從胃入腸。此法殊不中用矣。所以宋人附以十六味桔梗湯，兼合葶藶瀉肺之意外，內合邪之治也。

肺癰喘不得卧，葶藶大棗瀉肺湯主之。

此治肺癰喫緊之方也。肺中生癰，不瀉其肺，更欲何待。然日久癰膿已成，瀉之無益。日久肺氣已索，瀉之轉傷。惟血結而膿未成，當亟以瀉肺之法奪之。若一身面目浮腫，鼻塞清涕出，爲表證未罷，當

先與小青龍湯一劑。後乃服之。

石頑曰。肺癰危證。乘初起時。極力攻之。庶可救療。金匱特立二方。各有主見。如患人平昔善飲嗜嗽。痰涎漸漬於肺。宜皂莢丸。肥盛喘滿多痰。宜葶藶大棗湯。肺湯。千金補所不足。復立桂枝去芍藥加皂莢湯。以治風寒客邪。感觸發熱之證。葦莖湯以治心脾過勞。肺氣不化。水道不利之疾。功效最速。宋人又有十六味桔梗湯。雖未盡善。亦可以備諸治之採用。若畏其峻而守王道之方。真養癰以待斃耳。明眼者辯治宜。

早也。

凡欬嗽吐鼻稠痰。胸中隱痛。鼻息不聞。香臭。項強。不能轉側。欬則遺尿。自汗喘急。呼吸不利。飲食減少。脉數盛而芤。惡風。毛聳。便是肺癰之候。蓋由感受風寒。未經發越。停留肺中。蘊發爲熱。或挾溼熱。痰涎垢膩。蒸淫肺竅。皆能致此。慎不可用溫補保肺藥。尤忌發汗。傷其肺氣。往往不救。金匱皂莢丸。葶藶大棗瀉肺湯。千金桂枝去芍藥加皂莢湯。葶藶湯。宋人十六味桔梗湯。俱肺癰專藥。○初起用葶藶湯。此方大疏肺

氣服之使溼痰悉趨溺孔而去一二服卽應脉浮表熱加葱白香豉氣口脉盛加犀角竹茹痰多加貝母萸仁蛤粉引痛加紫苑白蜜○初起欬逆不利二味桔梗湯加貝母紫苑多汗加防已黃耆○潰後唾膿血不止葶藶薏苡瀉肺湯隨證加減○欬有微熱煩滿胸中塊壘甲錯者千金用合歡皮一味日取掌大一塊煎湯服○平昔勞心思慮多鬱火人唾臭痰鮮血此屬陰火但與生料六味丸加麥冬紫苑之類若誤投參耆補氣補火臭痰轉甚者急宜上法加童便

服之自清。初起疑似未真。生大豆絞漿飲之。不覺
腥氣。便爲真候。大抵聲音清朗。膿痰稀澤。或間有鮮
血。飲食知味。胸脇不疼。或欬則微痛。痛在右畔肺之
長葉。而坐卧得寧。形色如常。便溺自調者。可治。若潰
後大熱不止。時時惡寒。胸中隱痛。痛在左畔肺之短
葉。此金氣淺薄。潰後最難平復。而喘汗面赤。坐卧不
安。飲食無味。膿痰腥穢不已者。難治。若喘鳴不休。脣
反咯吐膿血。色如敗油。滯臭異常。正氣大敗。而不知
痛。坐不得卧。飲食艱進。爪甲紫而帶灣。手掌如枯樹。

皮面艷紅。聲啞鼻煽者不治。○肺癰初起。脉不宜數大。潰後最忌短滿。脉緩滑而白者生。脉弦急面赤者死。○肺癰已破入風者不治。卽濃煎葱白香豉湯頻服之。然多不救。

肺癰丹方。初起唾臭痰沫。用陳年芥蘼汁溫服。灌吐最妙。一方用荷葉濃煎。稍入白蜜。不時服之。不問已潰未潰皆効。又方以猪肺去心。竹刀刮去垢沫。取接骨木二兩。缶器中煮熟。淡食日服。無間五七日當効。潰後排膿。用金經湯。以小活鯉魚去腸。垢入貝母末。

三錢。隔水重便煮。和汁食之。日服一枚。皆屢驗。然不若薏苡根搗汁。頓熱服之。其効最捷。下咽其臭卽解。有蟲者蟲卽死出。薏苡爲肺癰專藥。然性燥氣滯。服之未免上壅。不及根汁之立能下奪。已潰未潰皆可挽回。諸方皆不及也。○肺癰潰後。膿痰漸稀。氣息漸減。忽然臭痰復甚。此餘毒未盡。內氣復發。必然之理。不可歸咎於調理服食失宜也。但雖屢發而勢漸輕。可許收功。若屢發而痰穢轉甚。脉形轉疾者。終成不起也。

瘖 音陰

經云。邪入於陰則瘖。○人卒然無音者。寒氣客於厭。則厭不能發。發不能下。至其開闔不致。故無音。失音大都不越於肺。然須以暴病得之。爲邪鬱氣逆。久病得之。爲津枯血槁。蓋暴瘖總是寒包熱邪。或本內熱而後受寒。或先外感而食寒物。竝宜辛涼和解。稍兼辛溫散之。消風散用薑汁調服。緩緩進之。或只一味生薑汁亦可。冷熱嗽後失音尤宜。若咽破聲嘶而痛。是火邪遏閉傷肺。昔人所謂金實不鳴。金破亦

不鳴也。古法用清咽寧肺湯。今改用生脉散合六味丸作湯。所謂壯水之主以制陽光也。○肥人痰滯壅滯。氣道不通而聲瘖者。二陳導痰開滯之一切滋補皆爲禁劑。至若久病失音。必是氣虛挾痰之故。宜滋肺腎之化源。非生脉散下都炆丸不可。凡咽乾聲稿者。潤肺爲主。生脉散合異功散。若膈內作痛。破瘀爲先。代抵當丸最妥。更有舌瘖不能言者。亦當分別新久。新病舌瘖不能言。必是風痰爲患。類中風例治之。若肥人舌短不能言。或舌根強硬。導痰湯爲主。若久

病後。或大失血後。舌萎不能言。大虛挾寒例治之。要在臨證審察病因無誤。然中風暴病失音。多緣少陰真氣久虛而得。更兼遺尿五絕證見。不可治矣。若冬月欬嗽。寒痰結於咽喉。語聲不出者。此寒氣客於會厭。故卒然而瘖也。麻杏甘石湯。或古今錄驗續命湯選用。若失音不語。已經發散潤肺而不應者。生脉散并童真丸。喻化之。若欬喘氣促。而胸中滿悶。聲瘖不出者。肺胃氣燥。不能祛散餘邪也。紫菀散主之。亦有叫罵聲嘶而喉破失音者。十全大補湯。若肺氣虛寒。

爲厲風所傷。喘欬聲嘶。或先傷熱而寒鬱熱邪聲瘖
不出者。千金酥蜜膏。又咽痛起於四五日間。或因欬
劇而得。或多稠痰結痰。而咽喉上腭腫痛。其聲雖啞。
而尚有音破濁。脉大緩而右寸尤甚。此熱結於肺也。
宜用辛涼之劑。如桔梗湯加葱白香豉荊芥薄荷。兼
有風寒客邪。更須桂枝芍藥薑棗膠飴之類。并以薑
蜜製黃檗噉之。慎不可驟用欬降之藥。若暴啞聲不
出。咽痛異常。卒然而起。或欲欬而不能欬。或無痰。或
清痰上溢。脉多弦緊。或數疾無倫。此大寒犯腎也。麻

黃附子細切湯溫之。并以蜜製附子啗之。慎不可輕用寒涼之劑。二證寒熱天淵。不可不辯也。胎前產後失音。另詳本門。

石頑治西客王如嵩。觸寒來蘇。忽然喘逆聲瘕。咽喉疼痛。察其形體豐盛。而飲噉如常。切其脉象浮。與而按之益勁。此必寒包熱邪。傷犯肺絡也。遂以麻杏甘石湯。加半夏細辛。大劑葶藶。二服喘止聲出。但呼吸尚有微瘕。更與二陳枳桔。葶藶之類。調理而安。

王惟一數年前雖有血證而年壯力強四月間忽患欬嗽服發散藥後痰中見血數口繼服滋陰藥過多遂聲嘶而啞時覺胸中氣塞遷延月餘乃兄勤中叩中邀余往診脉雖沉澁而按之益力舉之應指且體豐色澤絕非陰虛之候因諭之曰台翁之聲啞是金實不鳴良非金破不鳴之比因疏導痰湯加人中黃澤瀉方專一滌痰爲務四劑後痰中見紫黑血數塊其聲漸出而嚔未除更以秋石兼人中黃棗肉丸服經月而聲音清朗始終未嘗

用清理肺氣調養營血藥也

飛疇治郭代工午日少食角黍倦怠作瀉曾用消
尅不効因圖時跌仆卽昏迷不省數日後邀予診
視六脈虛微欲脫右臂不能轉動臂瘡無聞時有
用太黃消尅之劑者予急止之此脾肺虛憊安能
任此今縱有合劑恐胃氣告匱烏能行其藥力惟
粥飲參湯庶爲合宜所謂漿粥入胃則虛者沽遂
確遵予言以調之瀉止神寧聲音漸出而酥能食
後亦惟獨參湯調養不藥而愈

喘

短氣逆氣

少氣考

經曰諸病喘滿皆屬於熱。寒則息遲氣微。○欬欬上氣厥在胸中過在手陽明太陰。○氣有餘則喘欬上氣不足則息利少氣。○肺氣虛則鼻塞不利少氣實則喘喝胸盈仰息。○秋脉不及則令人喘呼吸少氣。○勞則喘息汗出。○邪入六府則身熱不得卧上爲喘呼。○夜行則喘出於腎淫氣病肺有所墮恐喘出於肝淫氣害脾有所驚恐喘出於肺淫氣傷心渡水跌仆喘出於腎與骨。○肝脉若搏因血在脇下令人

喘逆○喘欬者是水氣并陽明也○不得卧卧則喘者是水氣之客也○起居如故而息有音者此肺之絡脉逆也○二陽之病發心脾其傳爲息賁者死不治○二陽陽明也上不能生金而心火復刑之則肺傷故息上奔而喘○乳子中風熱喘鳴肩息者脈實大而緩則生急則死○乳子言產後以乳哺子時

非嬰兒也

戴復菴云有痰喘有氣急喘有胃氣虛喘有火炎上喘痰喘者凡喘便有痰聲氣急喘者呼吸急促而無痰聲胃氣虛喘者擡肩擷項喘而不休火炎上喘者

乍進乍退得食則減食已則喘大槩胃中有實火膈上有稠痰得食入咽墜下稠痰喘卽暫止稍久食已入胃助其溼火痰再升上喘反大作俗不知此作胃虛治治以燥熱之藥者是以火濟火也

趙養葵曰喘與短氣分則短氣是虛喘是實然喘多有不足者短氣間有有餘者新病亦有本虛者不可執論也如實喘者氣實脉盛呼吸不利肺竅壅塞右寸沉實宜瀉肺虛喘者先覺呼吸氣短兩脇脹滿右尺大而虛宜補腎此腎虛證非新病虛者乎邪喘者

由寒邪伏於肺中。關竅不通。呼吸不利。若寸沉而緊。此外感也。亦有六部俱伏者。宜發散。則身熱退而喘定。脉出。此鑿證。人所難知。非短氣中之有餘者乎。又一等似火非火。似喘非喘者。諸陽氣浮。無所依歸。故上氣而喘也。具人平日若無病。但覺氣喘。非氣喘也。乃氣不歸源也。不知者。以具有火也。誤以涼藥清之。以其喘急難禁也。又用四磨之類。寬之下咽之後。似覺稍寬。少頃依然。豈知寬一分。更耗一分矣。惟大劑參耆補劑。加補骨脂阿膠等。以鎮於下。後以八味。

丸加五味鹿茸不時服之。又一等火鬱之證六脉俱瀋甚至沉伏四肢悉寒甚至厥逆拂拂氣促而喘却似有餘而脉不緊數欲作陰虛而按尺鼓指此爲畜鬱已久陽氣拂遏不能營運於表以致身冷脉微而悶亂喘急當此之時不可以寒藥下之又不可以熱藥投之惟逍遙散合佐金丸之類宣通畜熱得汗而愈愈後仍以六味丸養陰和陽可也。

喻嘉言曰喘病無不本於肺惟兼三陰者爲最劇而三陰又以腎爲最劇有此證者首重在節慾收攝腎

氣不使上攻可也。故喘病兼少陰腎者爲最劇。腎火動則木氣升。其次則太陰脾脾火動則濕氣升。又次則厥陰肝肝火動則風氣升。是故治喘以治火爲先也。然濁氣旣隨火而升。火降而氣不降者何耶。以濁氣雖居於下。而肺之窠囊可以僑寓其中。轉使清氣遍處不安。是雖以治火爲先。然治火而不治痰無益也。治痰而不治窠囊之痰。雖治與不治等也。惟薑汁竹瀝可以透窠囊耳。

李士材曰。內經論喘。其因衆多。究不越於火逆上而

氣不降也。雖然火則一而虛實以分。每見世俗一遇喘家。純行破氣於太過者當矣。於不及者可乎。余嘗論證因虛而死者十九。因實而死者十一。治實者攻之。卽效無所難也。治虛者補之。未必卽効。須悠久成功。其間轉折進退。良非易也。故辯證不可不急而辯。喘證尤爲急也。巢氏嚴氏止言實喘。獨王海藏云。肺氣果盛。則清肅下行。豈復爲喘。皆以火燠真氣。氣衰則喘。所謂盛者非肺氣也。肺中之火也。斯言高出前古。惜乎但舉其端。未能縷悉。請得其詳而言之。氣虛

而火入於肺者補氣爲先生脉散有痰六君子湯陰
虛而火乘金不得卧者壯水爲念六味丸虛則合生
脉散風寒者解其邪華蓋散溼氣勝者利其水溼
湯暑邪者滌其煩白虎湯痰壅者消其痰二陳湯氣
鬱者疎其鬱四七湯肺脹者散其邪脉浮大者越脾
加半夏湯脉浮者小青龍加石膏湯腎虛火不歸源
八味丸腎虛水邪泛濫濟生腎氣丸此治喘之大法
也

喘嗽氣從臍下衝上而尺脉洪大或數兼見盜汗潮

熱屬陰虛六味丸作湯加補骨脂五味子送下靈砂丹誤用四磨必死若作痰治亦危○有因氣而喘者遇惱便發脉必沉弦此氣滯其痰也蘇子降氣湯若但喘不嗽不分遠近前湯吞靈砂丹○秋冬感寒每夜連嗽不絕大喘至天明方緩脇動痞悶者麻黃蒼朮湯○肺虛受寒而喘參蘇溫肺湯○寒鬱熱邪而喘中有積痰遇冷卽發麻黃定喘湯○遠年欬逆上氣胸滿痞塞聲不出者人參定喘湯○虛冷上氣勞嗽喘乏千金用半夏一升人參生薑桂心甘草各一

兩水煎分三次服。喘欬上氣不得卧生薑橘紅人參紫蘇各一錢五味數粒煎服。腎與肺胃俱虛喘嗽乏力人參一錢核桃肉三枚連皮蜜炙煎服神驗。○腎氣上逆而喘用連皮核桃肉三枚生薑三片臨卧細嚼即安。○七情鬱結上氣喘急四磨湯四七湯選用。○肥盛多痰喘不得休不能卧人扶而坐數日者千縉湯一服即安。或千縉湯合導痰湯尤妙。然惟元氣未衰者宜之。虛人未可輕試也。○喘而諸藥不効腹堅脉實者神保丸大便溏者勿用。○氣實人誤

服參耆而喘者三拗湯瀉之。但伏不得卧欬逆上氣面目浮腫者古今錄驗續命湯氣盛有餘脉來滑實者勿用。經年喘嗽遇寒更甚者九寶湯寧嗽化痰湯選用。一切喘證屬有餘者治之卽愈若屬虛證誤與泄氣禍不旋踵卽暴喘腹脹大便實者方可用藥加以溲泄必死勿治此陰火暴逆於手足太陰所以喘脹腎氣失守所以便溲其人雖強不久當嘔血而死。

診○脉宜浮遲不宜急疾喘逆上氣脉數有熱不得

難治。卧者難治。上氣面浮腫。肩息。脉浮大者。危。上氣喘息。低昂。脉滑。手足溫者。生。脉澹。手足寒者。死。右寸沉實。而緊。爲肺感邪。亦有六部俱伏者。宜發散。大抵喘屬肺中火盛。脉浮滑者可治。若沉滑爲腎虛。陰火上逆。

難治

式氣。短氣者。一屬支飲。脉必弦滑。平人無寒熱。胃眩。短氣不足以息者。實也。金匱云。短氣有微飲。當從小便去之。苓桂水甘湯主之。腎氣丸亦主之。仲景竝出二方。分呼吸之短。而治妙義益彰。呼氣之短。用苓

桂朮甘湯以通其陽陽氣化則小便能出矣。吸氣之短用腎氣丸以通其陰腎氣通則小便之關門利矣。○又云欬逆倚息不得卧小青龍湯脹滿者厚朴大黃湯。即小水○一屬氣虛東垣云短氣者肺主諸氣五藏之氣皆不足而陽道不行也。氣短小便利者四君子去茯苓加黃耆如腹中氣不轉者倍甘草肺氣短促或不足者倍參加白芍使肝膽之邪不敢犯之。若失血後陰火上乘而短氣不足以息或腎虛發熱哩痰者生脉散加歸耆生地。○病後產後一切瘡疽

潰後氣虛不能接續及年高病久正氣耗散之人雖有痰火不可作有餘治誤用耗氣之藥禍不旋踵須大劑生脉散爲君少佐陳皮扶接元氣爲主。

少氣○少氣者氣少不足以言也。經曰怯然少氣者是水道不行形氣消索也。又云言而微終日乃復言者此奪氣也。又云氣虛者言無常也。又云脾脉搏堅而長其色黃常病少氣其治法不離獨參湯生脉散。保元湯異功散之類。

逆氣○經曰人有逆氣不得卧而息有音者是陽明

之逆也。足三陽下行。今逆而上行。故息有音也。陽明者胃脉也。胃者六府之海。其氣亦下行。陽明逆不得從其道。故不得卧而息有音也。夫起居如故而息有音者。是肺之絡脉逆也。絡脉不得隨經上下。故留經而不行。絡脉之病人也。微故起居如故而息有音也。夫不得卧卧則喘者。是水氣之客也。夫水者循津液而流也。腎者水藏。主津液。主卧與喘也。若四磨湯七氣湯皆治陽明之氣逆。杏子湯小青龍湯越脾湯蘇子降氣湯皆治肺絡之氣逆。麻黃附子細辛湯腎氣

丸。靈砂丹皆治腎氣之逆。

哮○哮喘多屬寒包熱邪。所以遇寒卽發。喉中水雞聲。有積痰在肺絡中。必用吐法以提散之。不可純用寒涼。常須兼帶辛散。小青龍湯探吐最妙。年高氣弱人忌吐。○凡喘未發時以扶正氣爲主。旣發時以散邪爲主。○哮喘遇冷則發。其法有二。一屬中外皆寒。溫肺湯鍾乳丸。冷哮丸。選用并以三建膏護肺俞穴。最妙。一屬寒包熱。越脾加半夏湯。麻黃定喘湯表散其邪。平時用蘆吸散亦妙。古人治寒包熱邪預於八

九月未寒之時用滾痰丸下其熱痰後至冬無熱可
包則不發矣。○丹方治冷哮痰喘用胡椒四十九粒
入活蝦蟇腹中鹽泥煨存性卧時分三次醇酒服之
羸者諒分五七服用之輒効若有伏熱者誤用喘逆
倍劇不可不辯。○冷哮灸肺俞膏盲天突有應有不
應夏月三伏中用白芥子塗法往往獲効方用白芥
子淨末一兩延胡索一兩甘遂細辛各半兩共爲細
末入麝香半錢杵勻薑汁調塗肺俞膏盲百勞等穴
塗後麻瞢疼痛切勿便去候三炷香足方可去之十

日後塗一次如此三次病根去矣。遇厚味則發者用萊菔子炒研一兩猪牙皂炙燒存性三錢共爲細末薑汁調蒸餅爲丸綠豆大每服五十九沸湯或枳實湯下名清金丹消其食積則肺胃自清仍當薄滋味以清肺胃之氣。傷鹹冷飲食而喘者用白麴二錢砂糖二錢飴糖餅化汁捻作餅子爐內燂熟剗出加輕粉四錢令患人食盡吐出病根卽愈。年幼體虛者分三四次服之。蓋鹹哮肺胃受傷白麴砂糖膠飴甘溫戀膈使之留連病所引領輕粉搜滌淤積之痰。

上涌三涌三補屢建奇功補用五味異功稍加細辛服之。醋焙而嗽甘草二兩中半劈開用猪膽汁五枚浸五日火炙爲末蜜丸茶清吞二錢臨卧服之。凡哮喘見胸凸背駝者此肺絡敗爲癰疾不治

飛疇治韓順溪內子患喘證月餘服破氣寬胸豁痰清火等藥不効發表利水亦不應其疾轉急稍動則喘難休息診之六脈細數而血亦鼓陽用大劑六味地黃作湯加青鉛兩許一服而緩二服而止

諸嘔逆門

噎膈

靈樞云氣爲上膈者。食飲入而還出。蟲爲下膈。下膈者。食辟時乃出。

食飲入而還出。氣壅膈上。謂之上膈。然有虛實之分。若實而氣壅。則食無所容。虛而氣塞。則食不得化。皆令人食入即出也。至若食辟時乃出。蟲寒積聚而謂下膈。不過言膈證中有此一證耳。然有命門火衰不能生土。脾胃虛寒多致食辟時乃出者。

豈非下膈之證乎。讀者不可專以蟲爲下膈而膠執也。

素問云三陽結謂之膈。

三陽結者大腸小腸膀胱結熱也。小腸結熱則血脉燥。大腸結熱則後不通。膀胱結熱則津液涸。三陽俱結。前後秘澀。下旣不通。必反上逆。此所以噎食不下。從下而逆於上也。

飲食不下。膈塞不通。邪在胃脘。

不通者。濁氣在上。腎肝吸入之陰氣不得下而反

在上也。病在於胃，故飲食不下。

隔塞閉絕，上下不通，則暴憂之病也。

此言噎膈皆起於鬱結不舒，胃氣不能敷布所致。
張雞峯所謂神思間病是也。

薛立齋曰：內膈嘔逆，食不得入，是有火也；病久而吐食入反出，是無火也。若脾胃氣虛而胸膈不利者，六君子加下沉二香壯脾土以生元氣；若用辛熱之劑而嘔吐噎膈者，異功散加當歸、川斛益土以抑陰火；胃火內膈而飲食不入者，四君子加酒炒芩連清火。

養胃若脾胃虛寒飲食不入或食入反出者六君子
加木香炮薑溫中補脾如過服潤劑養血有傷於中
州者治法亦無越此若內有實積指迷七氣湯汚血
在胃者局方七氣湯加桃仁與乾漆同炒去漆用之
若誤服耗氣之藥血無所生噎膈而大便燥結者四
君子加當歸芍藥補脾生血若火逆衝上食不得入
者四君子加山梔川連清火養血若痰飲阻滯而食
不得入者六君子加木香山梔補脾化痰若不慎房
勞不節厚味不戒氣怒者不治年高無血亦不治噎

而白沫大出糞如羊矢不治胸腹嘈痛如刀割者死期迫矣。

李士材云噎膈反胃總是血液枯槁二證皆名爲膈。內經總有三陽結謂之膈一語。潔古分吐證爲三端。上焦吐者皆從於氣。食則暴吐。中焦吐者皆從於積。或先吐而痛。或先痛而吐。下焦吐者皆從於寒。朝食暮吐。暮食朝吐。大抵氣血虧損。復因憂思悲患。則脾胃受傷。血液漸耗。鬱氣生痰。痰則塞而不通。氣則上而不下。妨礙道路。飲食難進。噎塞所由成也。脾胃虛

傷運行失職不能熟腐五穀變化精微食雖可入良久復出反胃所由成也二者皆膈間受病故通名爲膈也噎塞之吐卽潔古之上焦吐反胃之吐卽下焦吐也王太僕云食不得入是有火也食入反出是無火也噎膈大都屬熱反胃大都屬寒然亦不可拘也脈大有力嘔吐酸臭當作熱治脈小無力嘔吐清水當作寒醫色之黃白而枯者爲虛寒紅赤而澤者爲實熱能令色脈庶乎無誤此證之所以疑難者方欲健脾胃痰恐燥劑有妨於津液方欲養血生津恐潤

劑有礙於中州審其陰傷火旺者當以養血爲先脾傷氣虛者當以溫補爲主此皆虛實陰陽之辨臨證之權衡也○冬三月陰氣在外陽氣內藏外助陽氣不得發汗內消陽火勿令瀉泄此固閉密之大要也○夏三月陽氣在外陰氣在內噎病值此時天助正氣而判其邪氣不治自愈或不愈者陰氣熱盛正氣不升耳四君子湯送開關利膈丸○每飲食入胃便吐涎沫如雞子白蓋脾爲涎脾虛不能約束津液故涎沫自出非人參白朮訶子益智仁不能攝也古人

指噎膈爲津液乾枯故水液可行乾物梗塞爲槁在上焦愚竊疑之若果津枯何以食纔下咽涎隨上湧乎故知膈咽之間交通之氣不得降者皆衝脉上行逆氣所作也惟氣逆故水液不能居潤下之常隨氣逆從耳若以津枯而用潤下之劑豈不反益其邪乎宜六君子加減挾寒脈遲細者加肉桂附子挾熱脈滑數者加枳實黃連若噎而聲不出者加五味子竹茹喉中有一塊食物不下者痰氣也加海石訶子膈間作痛多是瘀血歸尾桃仁韭汁童便甚者加大黃

微利之千金方治胸中久寒嘔逆氣上飲食不下結
氣不消用五噎丸若飲食不得下手足冷上氣欬逆
用五膈丸○血槁者地黃麥冬煎膏入藕汁人乳童
便蘆根汁桃仁泥和勻細細呷之○因火逆而噎梨
汁藕汁等分熬膏蜜收不時噙熱嚥之有痰加竹瀝
○因七氣致病而中挾冷熱食積胃氣不和而噎膈
者諸七氣湯選用○食物下咽屈曲自膈而下梗塞
作微痛此汚血在胃口也用四物加韭汁薑汁竹瀝
童便驢尿牛羊乳蜂蜜煎膏潤利之後以代抵當丸

下之若火盛作嘈痛者忌薑汁胃虛欲嘔吐者忌韭
汁犯之必轉劇。有冷積結滯者用理中加川烏頭
蜀椒川連巴豆霜皂莢末蜜丸涼水送下十五丸暫
服五七服後以四君子加黃耆橘紅砂仁調理如大
便燥結不時進開關利膈丸二三十丸以微導之。
丹方治噎膈吐逆不食用啄木鳥去毛熬膏和骨
鳩爛入麝香一錢蜜收磁罐盛好晝夜不時嗅之嗅過
卽蓋勿令散氣以其性善人木專泄肝鬱然在初起
時用之輒應若病久元氣槁竭雖服峻補尚難爲力

况外治乎。

診○脈緊而扎。緊則爲寒。扎則爲虛。虛寒相搏。脈爲陰結而遲。其人則噎。然多有至死。脈不變者。以胃中痰飲溼熱膠固。脈常和軟。然細察之。必兼弦象也。

易思蘭治一人。膈滿。其證胸脇胃脘飽悶。臍下空虛。如饑不可忍。腰腿痠疼。坐立戰慄。大便燥結。每日進清粥一二鍾。食下卽嘔酸吐水。服藥二年不効。診之。左右寸關俱沉。大有力。兩尺自浮至沉。三候俱緊。按之搖擺之狀。此氣膈病也。須開導其上。

滋補其下兼而行之遂與越鞠去山梔加連翹桔
梗木香侵晨令服八味丸百粒服至半月動履如
常。

喻嘉言治一婦病隔二十餘日飲粒全不人口尺
脈已絕不至詢其二便自病起至今從水一通一
味痰沫上湧懨懨待盡診得上部有脈下部無脈
是吐則未必死也但得天氣下降則地道自通然
婦人尺脈全無莫可驗其受孕萬一傷之呼吸立
斷用六君子加旋復花煎調赤石脂末服下嘔卽

稍定。三日後漸漸不嘔。又三日後漸飲。漸加舉家
欣快。但病者全不大便。刻刻以通利爲囑。曰。藏氣
久結。食飲入胃不多。積之既久。自然通透。若以歸
地。潤腸。恐滯膈。而作嘔。稍黃。通腸。恐傷胎。而殞命。
姑弗其計。堅持三五日。氣下。腸通。腹中之孕果漸
形著。而病全瘳矣。

又治一人患膈氣。粒米不入。始吐清水。次吐綠水。
次吐黑水。次吐臭水。呼吸將絕。一晝夜。先服理中
湯六劑。不令其絕。來早轉方一劑。而安。金匱有云。

噫氣不除者。旋復代赭石湯主之。吾於此病分別
用之者有二道。一者以黑水爲胃底之水。此水且
出。則胃中之津久已不存。不敢用半夏以燥其胃
也。一者以將絕之氣止存一系。以代赭墜之。恐其
立斷。必先以理中分理陰陽。使氣易於降下。然後
代赭得以建奇奏勳。乃用旋復花一味煎湯。調代
赭石末二匙與之。纔入口。卽覺其轉入丹田矣。但
困倦之極。服補藥二十劑。將息二月而愈。
李士材治張孟端夫人憂憤交乘。食下輒噎。胸中

隱隱痛陽脈滑而陰脈拘。痰血互凝之象。以二陳湯加歸尾桃仁。鬱金五靈脂四劑未効。因思人參與五靈脂同用。善於瀉血。卽以前劑入人參三錢。倍用五靈脂再劑。血從大便而出。十劑噎止。彌月而愈。

又治金元之之內患噎。胸腹奇痛。經阻。醫認瘀血。察其脈細爲氣衰。沉爲寒痼。況自下及上。處處皆痛。明非血矣。用參耆白朮木香薑桂煎成。和醇酒進之。甫入口。便快。服理中湯半月而痛止。

石頑治朱彥真酒膈嘔逆不食。每日惟痛飲熱酒。一二觥少頃卽作酸嘔出。膈間大痛。難治。經年不効。良由平昔好飲熱酒所致。此卽丹溪所謂好飲熱酒死血留胃口之候。授以人參散。方用人參一兩煎成。加麝香半分。冰片三釐。三劑便能進食。蓋麝片善散胃口之痰與瘀血耳。十劑後改服香仁湯半月而安。二方出自雲岐。人多未知。每以予爲尚異。何可爲之辯耶。

又治沈錫蕃平昔六便燥結。近患噎膈。不能安穀。

者月餘雖素稟豐腴近來面色皎白大非往昔時
方穀雨正此證危殆之際始求治於石頑診得六
脈沉瀟按久則衰幸舉指卽應爲疏六君子湯下
一味狗寶作散調服甫十劑而嘔止食進再十劑
而穀肉漸安更十劑起居如故惟是大便尚覺艱
難乃以六味丸去澤瀉加歸芍首烏作湯服至月
餘便溺自如秋深更服八味丸三月而康大抵噎
膈之人體肥痰逆者可治枯癯津衰者多不可治
同時有同道王公峻患此稟氣病氣與沈相類悞

信方士專力委之而致不起。顧人月亦患此。證自謂脹急不當用參。日服仙人對坐草而斃。郭孝聞八月間噎食艱進。六脈弦勁搏指。延至來春三月告殂。然瘦人間有可療者。昔秦伯源噎膈嘔逆而形神枯槁。神志鬱抑。且不能勝湯藥之費。予門人鄒恆友令其用啄木鳥人麝然膏。時嗅其氣以通其結。內服逍遙散加香砂以散其鬱。不數劑所患頓除。厥後海貨行陳君用噎膈亦用此法而愈。兩君至今色力尚強。又一農人噎膈不食。時嘔清涎。

如赤豆沙水。此屬血淤於內。可知庸師不審。誤用
消尅破氣藥。而致絕粒不食。迨所必至。其鄰叟憐
其貧窶。乃述其病苦。求救於予。遙擬一方。用桂苓
飲。加當歸。桃仁。丹皮。牛膝。用熬枯黑糖。和麤蟲漿。
調服。下滯黑如污泥者甚多。當知農人戮力受傷。
血鬱於內。而致嘔逆。但當攻其積血。嘔逆自已。孰
謂治病不求其本。而可輕議其藥哉。

反胃

金匱云問曰病人脈數數爲熱當消穀引食而反吐者何也師曰以發其汗令陽微膈氣虛脈乃數數爲客熱不能消穀胃中虛冷故也脈弦者虛也胃氣無餘朝食暮吐變爲胃反寒在於土醫反下之令脈反弦故名曰虛

凡脈陽盛則數陰盛則遲其人陽氣既微何得脈反數脈旣數何得胃反冷此不可不求其故也蓋脈之數由於誤用辛溫發散而遺客熱胃之冷由

於陽氣不足而生內寒。醫不達權。通變見其脈數。反以寒劑瀉其無辜。致上下之陽俱損。其脈遂從陰而變爲弦。上之陽不足。日中以前所食亦不消化。下之陽不足。日暮已後陽亦不入於陰。而糟粕不輸於大小腸。從口入者。惟有從口出而已。故曰胃氣無餘。言胃中之陽氣所存無幾。所以反胃而朝食暮吐也。

寸口脈微而數。微則無氣。無氣則營虛。營虛則血不足。血不足則胸中冷。

上條以汗下之故。而致病脈若此。此條以上焦營衛不逮。亦致反胃之證。故不復叙。唯言脈之陰陽。本象今微而數。微乃失陽之象。數乃失陰之體。奚止客熱而已。胸中者。營衛之海。營衛虛不統於胸中。故胸中冷矣。夫營衛之氣。出入藏府。健運周身。本生於穀。復消磨其穀。營衛非穀不充。穀非營衛不化。所以胸中冷者。亦必致胃不納穀也。雖然。當以正氣不足論之。若以熱治寒。不惟反助客熱。且復耗其氣。損其陰矣。世人治是病。非丁附則薑桂。

孰知正氣爲何如哉。

跌陽脈浮而濇。浮則爲虛。濇則傷脾。脾傷則不磨。朝食暮吐。暮食朝吐。宿穀不化。名曰胃反。脈緊而濇。其病難治。

脾氣運動。則脈不濇。胃氣堅固。則脈不浮。今脈浮。是胃氣虛。不能腐熟水穀。脈濇。是脾血傷。不能消磨水穀。所以陽時食入。陰時反出。陰時食入。陽時反出。蓋兩虛不相參合。故莫由轉輸。下入大小腸也。河間謂跌陽脈緊。內燥盛而中氣衰。故爲難治。

可見浮脈病成。必變緊脈也。況緊而見濡。明是亡血之象。上腕亡血。膈間乾滯。食不得入。下腕亡血。必并大小腸皆枯。食不得下。故難治也。

嘔而脈弱。小便復利。身有微熱。見厥者難治。四逆湯主之。

穀入於胃。長氣於陽。脈道乃行。今胃不安於穀。而成嘔。嘔則陰氣不資於脈。故脈弱。弱則陽氣虛。不能充於內外。下焦虛則小便自利。上焦虛則濁氣上升。逼迫其浮陽於外。外雖假熱。內實真寒。證成。

厥逆頃刻決離而不返矣。治之誠難。非四逆湯不能挽回也。

諸嘔吐穀不得下者。小半夏湯主之。

諸嘔吐穀不得下。指暴病嘔吐而言。故以半夏生薑滌除胃中痰飲。水穀自無阻礙矣。

胃反嘔吐者。大半夏湯主之。

胃反嘔吐。爲脾胃氣虛而飲積。故用半夏之燥。溼卽兼人參以補胃氣也。蜜者性滯滋溼。用之何哉。以胃之上脘燥。故食難入。雖食亦不得下。中脘用

之以潤胃燥。揚之水者。佐蜜以潤上脘之燥也。

胃反吐而渴。欲飲水者。茯苓澤瀉湯主之。

胃反吐。津液竭而渴也。欲飲水以潤之。無小便不利。而用澤瀉。何哉。觀外臺以此治消渴。脉絕。胃反嘔食。則知水雖入而不散於脉。脉之陰體絕矣。澤瀉者。不惟利膀胱之溺。亦能引桂薑之辛入膀胱。行布水精於五經。故凡渴欲飲水者。多用行水之劑。豈獨防其水停而已哉。正欲行水布散。經脉滋潤。表裏解其熱鬱耳。茯苓之淡。行其上。澤瀉之鹹。

行其下白术甘草之甘布其中桂薑之辛開其道
通其氣導其水以令四布而和營衛也

反胃係真火式微胃寒脾弱不能消穀朝食暮吐暮
食朝吐或一兩時而吐或積至一日一夜腹中脹悶
不可忍而復吐雖曰脾胃虛寒然致病之由必有積
滯於內千金治反胃初起用金匱茯苓澤瀉湯去白
术換乾薑加人參橘皮大黃青竹茹得利去大黃爲
胃虛反食下喉便吐之主方○若吐出原物酸臭不
化此飲食入胃既抵胃之下脘復返而出也宜理中

湯爲主。甚則加丁附川連。若脈數而邪熱不殺穀。乃火性上炎。多升少降。應與異功散加沉香川連歸芍生地。○食物之後冷涎不已。隨即反出。或心腹覺疼。藿香安胃散。或六君子加丁香藿香。○咽喉阻塞。胸膈滿悶。暫用香砂枳朴。以開其結滯。然破氣藥過多。中氣因而不運。異功散加香砂。使氣旺自能運化。○氣滯痞塞。實痛。平胃散加藿香砂仁。○胃虛中氣不運而噎塞者。四君子加黃耆橘紅砂仁。○反胃而渴。欲飲水。金匱茯苓澤瀉湯。千金去白朮。生薑加半夏。

小便不利。桂苓丸加半夏澤瀉。甘草生薑作湯服。虛人反胃多渴。七味白朮散。反胃食入一日半日吐出如故。乃胃氣虛弱而有痰。不能消化。隨氣逆上也。二陳加丁香藿香雞內金。虛加白朮炮薑。大便燥結久閉不通。似屬血熱。不可頓攻。止可清熱潤燥。小製湯丸漸次加之。關局自透。開關利膈丸。然服通利之劑過多。血液耗竭。轉加閉結者。宜用人參固本丸料煎膏。時時服之。○胃反上氣。食即吐出。屬熱者。千金用蘆根茆根等分煎服。不應加竹茹生薑。○反胃。

倦怠無力垂死者以人參一二兩濃煎加薑汁頓服屬寒者加桂附少許下焦虛寒不能生土食久反出用附子一枚切去尖上一片鏤成一孔入丁香四十丸粒仍將切下者掩上紮定搗取生薑自然汁煮熟焙乾爲末每用一匙置舌上徐徐以津唾送下若煩渴則頻與糜粥忌油膩生冷此孫兆秘傳緊効虛甚者加人參一兩駕馭之○鬱悵失意人或孤寡初起自當舒鬱逍遙散久之必兼補養歸脾湯○命門火衰不能生土食久反出其脈沉遲八味丸加丁沉間

進黑錫丹。○精衰不能蒸騰於上。咽喉閉塞。水穀難進。強食則吐者。六味丸加肉桂五味。不應加沉香砂仁。○有陽虛不能統運。嘔逆便秘。用人參大黃附子攻之。卽通。然真氣竭者終不可救。○瘀血在膈阻滯氣道而成者。代抵當丸作芥子大服二錢。去枕仰臥。細細嚥之。但飲熱湯及椒薑輒咽者。卽瘀血也。○反胃而胸中嘈雜不寧。或作或止。其人懊憹。而上有白點者。作蟲積治之。○丹方治噎膈反胃。用虎脂酥炙爲末。每服二錢。獨參湯送下。或猫胞一具炙脆爲末。

稍加腦麝陳酒服之虎咬生人猫食生鼠其性則一故可代用若胃中寒痰不能納食者狗寶爲末每服五七分至一錢陳酒服之已上三方輕者一服重者三服劇者不過七服後以理中四君八味等調之○又方用陳香櫟一枚去瓢入生薑汁拌生附子末一兩外以薑滓溼紙裏煨與透焙燥爲末每服五七分至一錢濃煎獨參湯服之此孫兆變法也○反胃初愈切不可與粥飲每日與獨參湯少加炒陳米不時煎服旬日後方可小試稀糜往往卽食飯者多致復

病而危。○凡反胃而致大吐白沫如雞子清者是肺胃俱虛。矢如羊糞則大腸血槁。卽大補氣血終亦必亡而已。

診○胃反脈數無力爲血虛。脈緩無力爲氣虛。數而有力爲有熱。數而滑疾爲有痰。緊而滑者寒飲上逆。小弱而濇。血虛胃反寸緊尺濇。其人胸滿不能食而吐吐止者爲下之故不能食。設言未止者此爲胃反。故脈微濇。

滑伯仁治一婦反胃。每隔夜食至明晚皆吐出不

消其脈沉而弱。他醫以煖胃藥罔効。滑遲疑未決。一日讀東垣書。謂反胃有三。氣積寒也。上焦吐者。從於氣。中焦吐者。從於積。下焦吐者。從於寒。脈沉而遲。朝食暮吐。暮食朝吐。小溲利。大便秘。爲下焦吐也。法當通其秘。溫其寒。復以中焦藥和之。滑得此說。遂以萸萵丁桂半夏二十餘劑而安。所謂寒瀝所勝。平以辛熱也。

石頑治湯伯乾子年及三旬。患嘔吐經年。每食後半日許。吐出原物。全不穢腐。大便二三日一行。仍

不燥結渴不喜飲小便時白時黃屢用六君子附
子理中六味丸皆罔効日瀕於危逮後延余診之
其兩關尺弦細而沉兩寸皆濇而大此腎藏真陽
大虧不能溫養脾土之故遂以崔氏八味丸與之
或謂附子已經服過二枚六味亦曾服過恐八味
亦未能克効也余曰不然此證本屬腎虛反以葛
附白朮伐其腎水轉耗真陰至於六味雖曰補腎
而陰藥性滯無陽則陰無以生必於水中補火斯
爲合法服之不終劑而愈

嘔吐噦

乾嘔吐酸

漏氣嘔水

走嘔吐沫

嘔苦吐蠅

中酸

經云諸逆衝上皆屬於火諸嘔吐酸皆屬於熱胃熱則嘔

○寒氣客於腸胃厥逆上出故痛而嘔也○人之噦

者穀入於胃胃氣上注於肺今有故寒氣與新穀氣

俱還入於胃新故相亂真邪相攻氣并相逆復出於

胃故爲噦○病深者其聲噦

金匱云病人欲吐者不可下之

欲吐者陰邪在上也若下之不惟逆其陽氣反傷

無故之陰變害莫測豈獨反胃而已

嘔而胸滿者吳茱萸湯主之。

傷寒論用是方治食穀欲嘔之陽明證以中焦有寒也。茱萸能治內寒降逆氣。人參補中益陽。大棗緩脾生薑發胃氣且散逆止嘔逆氣降胃之陽行則胸滿消矣。此脾藏陰盛逆胃與大肝腎下焦之寒上逆於中焦而致者卽用以治之。故乾嘔吐涎沫頭痛亦不出是方也。

嘔而腸鳴心下痞者半夏瀉心湯主之。

是證由陰陽不分塞而不通留結心下爲痞於是

一胃中空虛客氣上逆爲嘔下走爲腸鳴故用是湯
一分解陰陽水升火降則留者散虛者實也
嘔吐而病在膈上後思水者解急與之思水者豬苓
散主之

嘔而思水者水飲逆於胸中也故用豬苓之味淡
從膈上滲其所積之飲更以白朮利水生津使水
精四布而嘔自除矣

嘔而發熱者小柴胡湯主之

嘔而發熱邪在半表半裏逆攻而上也雖非傷寒

之邪而病勢則一故卽以小柴胡湯和之

食已卽吐者大黃甘草湯主之

胃素有熱食復入之兩熱相衝不得停留用大黃下熱甘草和胃按仲景旣云欲吐者不可下又用大黃甘草湯治食已卽吐何也曰欲吐者病在上因而越之可也逆之使下則必悞亂而益甚旣吐矣吐而不已○有升無降○當逆折之○使其下行○故用大黃○丹溪云凡病吐者○切不可下○近於困矣○吐後渴欲得水而貪飲者○文蛤湯主之○汗出卽愈○兼

主微風脈緊頭痛。

是方卽大青龍湯無桂枝有文蛤。大青龍主發散風寒。兩感。今是證初不言外邪。而用取汗。何哉。蓋因陽明經中有實熱。所以貪飲。故用麻黃杏仁開發腠理。甘草薑棗調和營衛。石膏解利鬱熱。文蛤直入少陰。散水止渴。爲太陽少陰二經散邪滌飲之聖藥。故又主微風脈緊頭痛之疾。

乾嘔噦若手足厥者。橘皮湯主之。

乾嘔而噦。手足厥逆。乃胃中陽氣爲痰飲阻塞不

得流布四末。故用橘皮生薑之辛以開痰利氣也。
噦逆者橘皮竹茹湯主之。

中焦氣虛則下焦之風木得以上乘。殺氣因之。不
宣變爲噦逆。用橘皮升降中氣。人參甘草補益中
焦。生薑大棗宣散逆氣。竹茹以降膽木之風熱耳。
乾嘔吐逆吐涎沫。半夏乾薑湯主之。

乾嘔吐逆吐涎沫者。由客邪逆於肝脾。寒主收引。
津液不化。遂聚爲涎沫。用半夏乾薑之辛溫中燥
溼。漿水之酸收而行之。以下其逆也。

虻蟲之爲病。令人吐涎。心痛。發作有時。毒藥不止。甘草粉蜜湯主之。

徐忠可云。此論虻病之不因寒者也。故其證獨心痛吐涎而不吐虻。然其痛發作有時。謂不恆吐也。則與虛寒之綿綿而痛者遠矣。毒藥不止。則必治氣。治血。攻寒。逐積之藥。俱不應矣。故以甘草粉蜜主之。白粉殺蟲。蜜與甘草。旣以和胃。又以誘蟲也。嘔吐噦皆屬於胃。但有氣血多少之異。嘔屬陽明。多血多氣。故有聲有物。氣血俱病也。氣逆者散之。所以

生薑爲主吐屬太陽多血少氣故有物無聲乃血病也。以橘紅主之。痰屬少陽多氣少血故有聲無物乃氣病也。以半夏主之。三者皆因脾虛或寒氣客胃飲食所傷致上逆而食不得下也。

治嘔吐以二陳湯爲主。如氣滯者加白豆蔻砂仁。熱吐加黃連。冷涎吐加丁香。氣升嘔加沉香。氣不和加木香。入薑汁少許。○食頃卽吐者半夏生薑煎服。食入卽嘔橘皮生薑煎服。食已則吐橘皮半夏生薑煎服。○食久而吐爲反胃。脈沉無力理中湯。或三物大

建中湯去乾薑加白朮桂心橘皮脈滑而實且食暮吐暮食朝吐此下焦實半夏大黃等分爲末薑汁和丸微利之。嘔吐穀不得下小半夏湯。逆氣心中煩悶氣滿嘔吐千金半夏湯卽金匱小半夏湯加桂心少氣加甘草夫半夏生薑之辛但治上焦氣壅表實若胃虛者惟宜益胃推揚穀氣而已忌用辛瀉故服小半夏湯不愈者服大半夏湯立愈。久寒胸膈逆滿不能食吳茱萸湯加桂心半夏甘草小麥酒煎服。寒吐者喜熱惡寒肢冷脈細而滑用理中湯加

枳實或二陳加丁香炮薑並須微溫與服。○熱吐者喜冷惡熱煩渴小便赤澀脈洪而數二陳加梔連作茹枇杷葉葛根薑汁蘆根汁。○怒中飲食嘔吐胸滿膈脹關格不通二陳加青皮木香米効丁沉香砂仁厚朴神麴更不効有瘀血也當從蠶血例治。○中脘素有痰積遇寒即發俗名冷涎泛宜丁香豆蔻砂仁乾薑陳皮半夏生薑白芥子。○嘔痰而致厥者乃寒痰逆悶謂之痰厥薑附湯加朮半細辛。○痰滿胸喉粥藥到口即吐先用生薑湯下黑錫丹以鎮墜之。

候藥可進。則以二陳加枳朮砂仁。厚朴薑汁。虛加人參。○有一等肝火逆證。亦嘔而不食。但所嘔者。或酸水。或苦水。或青藍水。惟大小便不秘。亦能作心痛。此是火鬱木鬱之候。木鬱達之。火鬱發之。須用芎藭連濃煎細細呷之。再服逍遙散。○脾胃本虛。機關不利。不能運化。而水到咽管。輒便嘔出者。六君子加砂仁炮薑。使中央之樞軸轉。機關利。自不嘔矣。○丹溪云。凡嘔家。禁服瓜薑實。桃仁萊菔子山梔。一切有油之物。皆犯胃作吐。凡藥中帶香藥。行散方効。

噦者胃中虛冷或停水飲之故胃虛宜溫胃理中爲主。停水宜橘皮半夏湯。小便不利加桂心茯苓。胃虛不食加人參。肺胃有水喘欬上氣小青龙加減。亦有失於攻下胃中實熱而噦者證必腹滿仲景云噦而腹滿視其前後知何部不利利之則愈承氣湯猪苓湯是也。噦逆屬虛熱橘皮竹茹湯噦而虛寒橘皮乾薑湯寒甚去通草加丁香附子寒熱錯雜者去甘草加丁香柿蒂。傷寒後胃熱嘔噦千金通草橘皮湯。傷寒後嘔噦反胃乾嘔食不下千金蘆根飲子。

○春夏時行傷寒。寒傷於胃。胃冷變哕者。千金用橘皮。桂心。葛根各二兩。白茅根一升。水煎服。有熱去桂心。○噦聲頻密相連爲實。攻熱爲主。若半時噦一聲者。爲虛。溫補爲主。如腹滿。不尿。脈散。頭汗。目瞪而噦者。死在旦夕。

千金云。凡服湯嘔逆不入腹者。先以甘草一兩水煎服之。得吐。消息定。然後服餘湯。便不吐也。凡嘔者多食生薑。此是嘔家聖藥。

診○上部有脈。下部無脈。其人當吐。不吐者死。脈陽

緊陰數爲吐。陽浮而數亦吐。寸緊尺濇胸滿而吐。寸口脈數者吐。緊而濇者難治。緊而滑者吐逆。脈弱而嘔。小便復利。身有微熱。見厥者難治。病人欲嘔吐者不可下之。嘔吐大痛。吐出色如青菜色者危。

乾嘔。乾嘔者有聲無痰。然不似噦聲之濁惡而長也。宜橘紅煎湯入薑汁白蜜少許細細呷之。胃虛加人參。胃寒加炮薑。胃虛濁氣上逆。吳茱萸湯。乾嘔發熱者。黃芩湯。乾嘔而利者。黃芩加半夏生薑湯。漏氣。身背熱。肘臂牽痛。其氣不續。膈間厥悶。食人

則先嘔而後瀉名曰漏氣。此風熱閉其腠理。上焦之氣。慄悍滑疾。遇開卽出。經氣失道。邪氣內著。故有此證。千金麥冬理中湯主之。肥盛多痰者。澤瀉湯主之。走哺。下焦實熱。其氣內結。不下。泌糟粕而於溺。反蒸於胃。故二便不通。氣逆不續。嘔逆不禁。名曰走哺。人參湯主之。食已暴吐。脈浮而洪。此上焦火逆也。宜橘半枳桔。厚朴。檳榔。茯苓。白朮。氣降則火自清。吐漸止。乃以人參芍藥補之。下閉上嘔。亦因火在上。焦宜枳桔。陳皮。厚朴。檳榔。大黃。木香。微利之。

嘔苦○邪在膽經。木善上乘於胃。吐則逆而膽汁上溢。所以嘔苦也。宜吳茱萸黃連茯苓澤瀉生薑○邪在膽逆在胃。膽液泄則口苦。小柴胡湯○胃氣逆則嘔苦。吳茱萸湯。

中酸○溼熱鬱積於肝。肝火逆上。伏於肺胃之間。飲食入胃。被溼鬱遏。不得傳化。故作中酸。所謂曲直作酸是也。佐金丸○薛立齋云。吞酸噯腐。多屬脾虛木旺。證多而色痿黃。胸膈不利。舉世好用清氣化痰之藥。多致大便不實。食少體倦而危。當用六君子加炮

薑木香吳茱萸脾腎俱虛六君子加肉苳蔻補骨脂
中氣虛弱者理中湯加吳茱萸鬱火連理湯不應補
中益氣加木香炮薑送佐金丸中氣虛寒必加附子
或附子理中湯無有不愈○凡中酸不宜食粘滑油
膩者謂氣不通暢也宜食疏淡諸物使氣通利

吐酸○內經以諸嘔吐酸皆屬於熱東垣又以爲寒
者何也○若胃中溼氣鬱而成積則溼中生熱從木化
而爲吐酸久而不化肝木日肆胃土日衰當平肝扶
胃逍遙散服佐金丸若宿食滯於中脘平胃散加白

豆蔻藿香砂仁神麴

嘔水○渴欲飲水水入卽吐者名曰水逆五苓散氣
虛四君子去甘草加枳橘生薑不應六君子換赤茯苓
苓用伏龍肝煮湯澄清代水煎藥

吐沫○胃中虛寒不能約束津液故吐涎沫宜六君
子加益智生薑或理中湯加益智以收攝之

吐虵

音

○吐虵有寒有熱有寒熱交錯寒則手足厥

逆吐出之虵色淡白者理中湯加烏梅黃連蜀椒甚
則虵死而形扁者危矣熱則虵色赤而多日跳動不

已安。虻丸主之。寒熱交錯則病者靜而復時煩得食而嘔。虻聞食臭出其人當自吐。虻烏梅丸主之。大抵吐虻寒熱交錯者。多方中。都川椒黃連烏梅之類。蓋虻聞酸則靜。得苦則安。遇辣則伏而不動也。若快服消尅及攻蟲諸藥。不應甘草粉蜜湯主之。

石頑曰。夫病有不現經論之異證。則其治亦必有不。由繩墨之異法。如王御九仲君。因驚恐受病。時方晚。饑即兀兀欲吐而不得出。遂絕粒不食。而起居自如。半月以來。醫藥不靈。舉家無措。向後醉酒高粱。畧無。

阻礙惟是殺氣毫不可犯犯之輒嘔吳中名師從未
有一識其爲何病者然各逞臆見補瀉雜陳丹方迭
進牛黃狗寶虎膽貓胞總無交涉兩三月來溼麤亦
得相安但完穀一試雖極糜爛立時逐出延及八月
莫可誰何偶遇一人謂言此病非藥可除合用生鷺
血乘熱飲之一服便安此雖未見於方書揆之於理
諒無妨礙一陽之夜遂宰一鷺取血熱飲下咽汨汨
有聲忍之再三少頃嘔出瘀血升許中有血塊數枚
是夜小試稀糜竟不吐出其後漸能用飯從少至多

無藉湯藥而安常思此病之不可解者胃既不安稼
穡何反勝任血肉之味今飲鴛血嘔出宿瘀頓愈因
攷本草言鴛性涼利五藏千金方云射工毒蟲鴛能
食之可知其有祛風殺蟲解毒散血之功也今用其
血以開其結確有至理逆推受病之源原因驚恐所
致驚則氣亂載血上逆而兀兀欲吐若彼時吐出却
無苑積於中胃氣阻逆之患矣胃氣阻逆谷神得不
困憊乎其血肉可噉者正賴脂膏以攸利藏府之氣
也然藏府之氣非穀不安而安穀全賴乎血血者神

氣也故取善消穀氣之血乘其生氣未離是可直透
關鑰引領宿積之瘀一涌而胸次蕩然雖屬尋常食
品而涼利五藏之功詢不尋常先是有人患此絕粒
三載得此頓愈其後中翰金淳還公郎太史韓慕廬
東坦咸賴此霍然遠近相傳凡噎膈嘔逆用之輒効
當知噎膈嘔逆雖屬胃中血枯若中無瘀結何致捍
格不入故取同氣相感之力一涌而蕩散無餘真補
中寓瀉之良法詳鷺血可以激發胃中宿滯則生鴨
血未爲不可生黃牛血亦未爲不可總取以血攻血

而無峻攻傷胃之虞。昔喬三餘治一總戎患噎膈百藥不應。喬以法激之。嘔出瘀積數升而安。喻嘉言治一血蠱用法激之上涌。然後用藥法皆秘而不宣。由是類推可以默識其旨。此與勞傷吐血之日宰鴨血沖熱酒服同源異派。深得肘後經奧旨。足補夏子益奇方之未逮。

虞恒德治一中年婦產後傷食致脾虛不納穀。四十餘日聞穀氣則惡心。聞藥氣則嘔逆。用異功散加藿香砂仁。神效。陳倉米先以順流水煎沸調伏。

龍肝攪渾澄清取二盞加薑棗煎服遂不吐別以
陳倉米煎湯時時嚥之服前藥二三劑漸安
薛立齋治一婦年三十餘忽不進飲食日飲清茶
三五碗少用水果經三年矣經水過期而少此思
慮傷脾脾氣鬱結所致用歸脾湯加吳茱萸不數
劑而飲食如故

又治一婦因肝脾鬱滯而不飲食二年面部微黃
浮腫仍能步履但肢體倦怠肝脾二脈浮弦按之
微而結滯用六君子加吳茱萸下痰積甚多飲食

頓進形體始瘦卧床月餘仍以六君子加減調理而安。

周慎齋治一人飲食如常每遇子時卽吐大便秘詢其人必有苦慮憂思脾氣鬱結故幽門不通宜扶脾開竅爲主用人參白朮以蒼朮拌炒茯苓各一錢炙甘草五分附子煮烏藥三分水煎服愈石頑療吳江署篆張公年壯體豐恆有嘔逆痰涎之恙六脈每帶濡滑惟二陳加枳朮石斛輩服之應手良由政務繁冗心力俱勞所致耳。

霍亂

乾霍亂

計利

經云清氣在陰濁氣在陽營氣順行衛氣逆行清濁相干亂於腸胃則爲霍亂。厥氣上逆則霍亂。傷寒吐利由邪氣所傷霍亂吐利由飲食所傷其有兼傷寒之邪內外不和加之頭痛發熱而吐利者是傷寒霍亂也。原仲景之意豈非在飲食始爲是病彼以寒邪傳入下焦胃氣因之不和陰陽痞隔者安得不有以致之乎不然何以用理中四逆治之耶此病多發於夏秋之交在寒月亦間有之昔人云多山伏

暑所致然亦未必皆爾大抵溼土爲風木所尅則爲是證故嘔吐瀉泄者溼土之變也轉筋者風木之變也合諸論而求之始爲活法然多有鬱結傷脾飲食停滯一時停塞氣不升降而然夏月霍亂吐瀉作渴胃苓湯加半夏藿香而赤口乾加炒川連春夏秋三時飲食後觸冒暴寒成此證者藿香正氣散若吐利轉筋爲風木行脾平胃散加木瓜○夏秋感冒吐瀉霍亂六和湯爲要藥身熱煩渴氣麤喘悶或吐瀉厥逆躁擾者此傷暑霍亂宜香薷飲沉冷服甚則手足

厥逆少氣。脣面爪甲皆青。六脈俱伏。而吐出酸穢。瀉下臭惡。便溺黃赤者。此火伏於厥陰也。爲熱極似陰之候。急作地漿煎竹葉石膏湯。誤作寒治必死。○夏秋霍亂多食冷水瓜果所致。宜木香藿香陳皮厚朴蘇葉生薑。四肢重著骨節煩疼。此兼溼也。二朮二苓厚朴陳皮澤瀉。七情鬱結。宜烏藥香附木香厚朴枳殼陳皮紫蘇。○夏秋之交傷暑霍亂。大忌朮附薑桂種種燥熱之藥。悞服必死。凡夏秋霍亂有一毫口渴。卽是伏熱。不可用溫理脾胃藥。如燥渴小便不利五

苓散爲主。本方中肉桂亦宜酌用。惟泄瀉不渴。二便清利。不甚臭穢者。方可用。理中溫之。吐瀉不止。元氣耗散。病勢危篤。或水粒不入。或口渴喜冷。或惡寒戰慄。手足逆冷。或發熱煩躁。揭去衣被。此內虛陰盛。不可以其喜冷去被。爲熱。宜理中湯。甚則四逆湯。加食鹽少許。若暴瀉如水。周身汗出盡冷。脈弱不能言語。急投漿水散。並須冷服。若冒暑伏熱。腹痛作瀉。或利或嘔者。木瓜吳茱萸。食鹽同炒。煎湯溫服。胎前產後霍亂。另詳本門。○凡霍亂新定。周時內慎勿

便與穀氣多致殺人。以胃氣反逆不能平復也。如吐瀉已多。元氣耗極。審無邪者。方與米飲補養。

舉世治霍亂吐利不問虛實寒熱。槩用藿香正氣。不知此方專主胃氣不和。陰陽錯亂。或夏秋寒熱交加。飲食冷熱並進。及水土不伏之吐利。霍亂固爲合劑。如見厥逆冷汗。虛煩喘噦。而赤戴陽。脈來虛微。弦細無力。此脾腎俱虛。火衰不能生土。虛陽失守之候。在嚴冬見之尤爲最劇。猛進理中四逆。尚恐不救。况堪從事藿香正氣等耗氣之劑乎。

診○脈伏或微瀉者霍亂脈長爲陽明本病霍亂脈洪大者虛微遲細兼喘者凶氣口脈滑乃膈間有宿食雖吐猶當以鹽湯探吐之吐盡用和中藥凡吐瀉脈見結促代伏皆不可便斷爲死霍亂之後陽氣已脫或遺尿不知或氣快不語或膏汗如珠如躁欲入水或四肢不收舌卷囊縮皆爲死候

乾霍亂○心腹脹痛欲吐不吐欲瀉不瀉煩躁悶亂俗名攪腸痧此土鬱不能發泄火熱內熾陰陽不交之故或問方論皆言宿食與寒氣相搏何以獨指爲

火耶曰昏亂躁悶非諸躁狂越之屬火者乎每致急死非暴病暴死之屬火者乎但攻之太過則脾愈虛溫之太過則火愈熾寒之太過則反捍格須反佐以治然後火可散耳古法有鹽煎童便非但用之降火且兼取其行血不可廢也一法以鹽湯探吐并用鹽填臍中以艾灸二七壯屢効

吐利○吐利者言嘔吐而利是也上吐下利煩擾躁亂乃謂之霍亂與但稱吐利者有異蓋暴於旦夕者爲霍亂可延至數日者爲吐利耳○有吐瀉及痢疾

進湯藥太驟以致嘔逆。二陳加豆蔻砂仁甚則加沉香。有熱加薑汁炒川連。乾嘔而利者黃芩加半夏。生薑湯。上吐下瀉不止常渴而反不渴脈微細而弱者理中湯。或渴不能飲脈細數連理湯。夏月泄瀉或嘔吐生薑汁調天水散。有痰積泄利不止甚則嘔而欲吐利下不能飲食由風痰羈絆脾胃之間導痰湯加羌防。瀉屬脾宜升胃補中益氣湯吐屬胃宜醒脾六君子加香砂吐瀉竝作宜升胃醒脾二湯各半和服。

關格

靈樞云。陰氣太盛。則陽氣不能營也。故曰關。陽氣太盛。則陰氣弗能營也。故曰格。陰陽俱盛。不得相營。故曰關格。關格者。不得盡期而死也。

陰陽易位。病名關格。多不可治。若邪氣留著而致者。猶可治之。舌上胎白。而水漿不下。曰格。格則吐逆。熱在丹田。小便不通。曰關。關則不得小便。必用吐以提其氣之捍格。不必在出痰也。鹽湯探吐。并以牙皂湯浴其小腹及陰。或以鹽敷臍中。俱妙。有痰宜吐者。二

陳湯探吐之吐中便有升降有中氣虛不運者補氣
藥中升降先以四君子換參蘆探吐後用人參散栢
子仁湯調理脈沉細手足厥冷者既濟丸勞役後氣
虛不運者補中益氣湯加木香檳榔心脾疼後小便
不通皆是痰隔於中焦氣滯於下焦二陳加木通枳
殼服後探吐之寒在上熱在下黃連湯桂枝易肉桂
熱在上寒在下生料八味丸加牛膝車前○關格不
通不得尿頭無汗者可治有汗者死
石頑曰按內經所言人迎與寸口俱盛四倍以上爲

關格是以陽經取決於人迎。陰經取決於寸口也。越人云。遂上魚爲溢。爲外關。內格。遂入尺爲覆。爲內關。外格。仲景亦謂在尺爲關。在寸爲格。關則不得小便。格則吐逆。皆以陽分取決於寸口。陰分取決於尺內也。所以難經又言。上部有脈。下部無脈。其人當吐。不吐者死。仲景又有趺陽脈伏而漐伏。則吐逆。水穀不化。漐則食不得入。名曰關格。則知關格之脈證不一也。而馬仲化釋內經謂關格之義。非隔食癰閉之證。而張介賓類經直將越人仲景之言。一槩非之。獨執

人迎在頸爲陽明之表脈。遂詆東垣丹溪皆仍叔和
脈經左爲人迎右爲氣口之謬。嗚呼內經固爲聖經。
確宜遵從。而越人仲景之書未常不爲聖經也。蓋人
迎氣口所以分表裏之陰陽。寸口尺內所以分上下
之陰陽也。人一身表裏上下之氣化皆肺所司。血脈
皆心所主。故凡氣血之盛衰靡不變見於氣口。氣口
實爲肺經之一脈。不過分其部位以候他藏之氣耳。
卽如仲景所指趺陽少陰雖主於足。然未常不於關
尺推之。則內經所言人迎氣口候之左右亦無不可。

也。醫道貴乎圓通。若執中無權。猶執一也。故釋內經之關格。但當言是表裏陰陽否絕之候。不當與上吐下閉之關格混同立論。則可。若言上吐下閉當稱隔食。癰閉不得名爲關格。則不可。或言關格之證其脈未必皆然。則可。若言關格之脈必無在尺在寸之分。則不可。試觀仲景跌陽脈伏而濇。亦主關格。又有上微頭小者。則汗出下微。本大者。則爲關格不通等例。其義自明。

呃逆

噎氣

諸逆衝上

劉宗厚曰。呃逆有虛有實。有火有痰。有水氣。不可專作寒論。蓋傷寒發汗吐下後。與瀉利日久。及大病後。婦人產後。有此證。皆屬脾胃大虛。若因痰水停積。心下或因暴怒。氣逆痰厥。或傷寒熱病失下。則皆屬熱也。夫水性潤下。火性炎上。今其氣自下衝上。非火而何。大抵治法。虛則補之。虛中須分寒熱。如因汗吐下後。誤服寒涼過多。當溫補之。如脾胃陰虛。火逆上衝。當平補之。挾熱者。當涼補之。若實者。如傷寒失下。地

道不通。因而呃逆。當寒下之。如痰飲停畜。或暴怒氣逆。痰厥。此等必形氣俱實。別無惡候。隨其邪之所在。涌之洩之。清之利之。胃虛木挾相火直衝。清道而上者。異功散加肉桂。甚則加黃檗。附子送六味丸。吐利後。胃氣虛寒者。理中湯加附子。丁香柿蒂。吐利後。胃虛熱者。橘皮竹茹湯。呃逆嘔吐多者。屬胃虛有痰。半夏茯苓生薑兼食結痰積。則膈間飽悶。枳朮半夏生薑。平人飲熱湯及食椒薑。卽呃者。此胃中有寒痰死血也。死血用韭汁童便下。越鞠丸。虛人用理中。

湯加蓮木桃仁。痰加茯苓半夏。蓋呃逆皆是寒熱錯
亂。二氣相搏使然。故治亦多川寒熱相兼之劑。如丁
香柿蒂竝投之類。試觀平人冷呃。令其思想則止。思
則脾火氣乘。而胃氣和矣。○呃逆雖多有屬火者。然
病後久虛發呃。皆屬於寒。宜用半夏一兩。生薑一兩。
水煎熱服。或用丁香數十粒。柿蒂十枚。滾水泡服。或
理中湯加枳殼茯苓半夏。不應加。簕蒂丁香。若胃中
寒甚。呃逆不已。或復嘔吐。丁香煮散。或附子粳米湯
加炒川椒丁香。○暴怒呃逆。神昏吐涎。此肝火逆上。

防有血積膈間。若按之痛者。藕汁麻油服少頃。卽探吐之。不痛者。陳皮二兩煎湯探吐之。產後呃逆。最爲惡候。急灸期門左穴。艾炷如小豆大。宜服四逆加人參湯。羌活附子散。或桂心五錢薑汁三合和水煎服。

石頑曰。呃逆在辨寒熱。寒熱不辨。用藥立斃。凡聲之有力而連續者。雖有手足厥逆。大便必堅。定屬火熱。下之則愈。萬舉萬全。若胃中無實火。何以激搏其聲。逆上而衝乎其聲低怯。而不能上達於咽喉。或時鄭

聲雖無厥逆定屬虛寒。苟非丁附必無生理。若胃中稍有陽氣。何致音聲。餒怯不前也。蓋胃中有火。則有聲。無火。則無聲。誤以柿蒂蘆根輩治之。倉扁不能復圖矣。又有始熱終寒者。始本熱邪。因過用苦寒。寒鬱其熱。遂至呃逆。急宜連理湯加薑半主之。五六日大便不通者。削陳醬薑導之。若真陽素虛人。誤用苦寒。通其大便。必致熱去寒起。多成不救。復有飲熱飲冷而呃。背微惡寒。目睛微黃。手足微冷。大便溏黑者。屬瘀血。若飲熱則安。飲冷則呃。雖有背惡寒。手足冷。大

便溏等證。此屬溼痰。肥人多此。須推痰。血痰飲。例治之。

噫氣。○靈樞云。寒氣客於胃。厥逆從下上散復出於胃。故爲噫。○保命集云。噫者。胸中氣不交也。仲景云。噫氣不除者。旋復代赭石湯主之。則知噫氣爲中氣。不治土不制水。水飲上泛。故用旋復半夏以散痰飲。人參甘草薑棗以溫胃氣。代赭以鎮墜逆氣。而引參力下行也。若老人噫氣。乃胃中虛寒痰逆而然。止宜理中丸。溫助胃氣爲主。或加枳實香附砂仁之類助。

其消化雖然真氣已衰即使調理得宜終不能過五年矣。

諸逆衝上。○氣逆衝上。火氣炎上故也。經云逆氣象陽。凡氣逆必證象陽盛而赤脉洪。當以法降其逆。乃愈。若以氣象陽盛而用寒藥攻之。則不救矣。氣上衝咽不得息。喘息有聲不得卧。調中益氣湯加吳茱萸。觀厥氣多少用之。如夏月有此證爲大熱也。宜以酒炒川連知朮少加肉桂爲末。酒丸服二錢。仍多飲湯。少時以美饌壓之。使直至下焦。以瀉衝脉之逆也。蓋

逆者寒熱之氣逆而不順也。當隨四時寒熱溫涼以
制之。厥陰氣上衝心咽不得息。治法見傷寒厥陰病
條。戴復菴云。虛炎之證。陰陽不升降。下虛上盛。氣
促喘急。宜蘇子降氣湯下黑錫丹。

胃脘癰

內經病能論云人病胃脘癰。當候胃脈。其脈當沉細。沉細者氣逆。逆者人迎甚盛。甚盛則熱。人迎者胃脈也。逆而盛則熱聚於胃口而不行。故胃脘爲癰也。馬仲化云。胃爲水穀之海。其經多氣多血。脈見右關。木宜洪盛。今反沉細。則是胃氣已逆。人迎者胃經穴名。在結喉兩傍。動脈應手。其脈見於左手。今右關脈沉細。人迎甚盛。則是熱聚胃口而不行耳。靈樞經脈篇謂人迎大三倍於寸口。則胃經爲實。

卽此驗之而知胃脘癰之脈也。

仲景云嘔家有癰膿者不可治嘔膿盡自愈此不言癰之所在而言嘔膿者以其但嘔而不欬知非肺癰而爲胃脘癰明矣。內經曰熱聚於胃口而不行胃脘爲癰胃脘屬陽明陽明氣逆故膿不自欬出而從嘔出膿亦不似肺癰之如米粥者此出自胃脘從溼化而聚結成膿有結痰如蜆肉也。謂不可治嘔言不得用辛香溫胃止嘔之劑以膿之淤濁熏蒸殺氣故嘔若膿出則嘔自愈夫癰之在胃脘之上者則然若過

乎中在膈之下則膿從大便而出輕則金匱排膿湯重則大黃牡丹湯涼膈散選用若膿自上而吐輕則金匱排膿散重則射干湯或犀角地黃湯加忍冬連翹皆因勢利導之法也膿稀嘔止後用太乙膏作丸服虛人宜八珍加黃耆忍冬連翹之類調補之凡舌胎經久不退色黑垢膩口中作甜其氣穢濁卽是胃脘發癰之候明眼辨之毋俟癰成而致莫救也石頑治談仲安體肥善飲初夏患壯熱嘔逆胸膈左畔隱痛手不可拊便溺濇數舌上胎滑食後痛

嘔稠痰漸見血水脈來漈漈不調與涼膈散加石
斛連翹下胸臑頗多先是瘍醫作肺癰治不効予
曰肺癰必欬嗽吐腥穢痰此但嘔不嗽洵爲胃病
無疑下後四五日復嘔如前再以小劑調之三下
而勢甫平後以保元苓橘平調二十日而痊先時
有李姓者患此專以清熱豁痰解毒爲務直至膈
畔潰腐膿水淋漓纏綿匝月而斃民因見機不早
直至敗壞悔無及矣